



TAPAK 7

Karate Kid director
John G. Avildsen süogo



TAPAK 12

Srikanth-i Indonesia Open
Super Series kokogo

VOL. XIV NO. 241 (ADOK 241)

DIMAPUR

MONDAY

JUNE 19, 2017

5.00

CNTC-i sorkar dang Nagaland nung terenlok kasasa agütsütsü mepishir

Dimapur, June 18 (TYO): Central Nagaland Tribes Council (CNTC)-i state sorkar dang tejak mereprangi mesüra temulung nung kecha meyui, state ajungalen kasa terenlok mapa inyakang ta mepishia metetdaksü.

June 17, 2017 nü Tourist Lodge Dimapur nung CNTC executive council-i unit asem - Ao Senden, Sumi Hoho aser Lotha Hoho ketdangpurtem den külem senden ka amen.

Iba senden nung taoba mapang Mokochung Elakha ta ajaba Mokochung, Wokha aser Zunheboto district tem dak sendakba onüktem benoka lemsatop, ta Media Cell CNTC-i sangdong ka nung metetdaksü.

Yaküm kasa tesem nung senden amendang, CNTC kintem nungi sorkar yimsüsürtemi tekaratiba nung inyaksü ta nangzükba onüktem bilemettsü atema CNTC-i nenshia

metetdaksü.

Yaküm senden nung jembiba onüktemji- Khelhoshe Polytechnic Asukhuto, Nagaland University Lumami Campus, Foothill Road, Liphayan Governor's camp nung Doyang bridge, NHIDC-i inyakba Bokajan-Merapani highway aser Tuli Paper Mill tem indang liasü.

CNTC-i yimsüsürtem dang tekaratiba nung item khurettem agizüksü aser parnoki nangzükba ama nendaka inyaksü mepishia metetdaksü.

District asem nung infrastructure tsütsü timtem aliba, ketdangsüba nung metokmeperi, senotsü timtem aser sorkari zübazüba toktsüba onüktem asoshi senden nung adenertemi tribal hoho kübok kuli bushiba teloktem tentettsü aser osang bendentsü atema bangzünga renem, ta Media Cell CNTC sangdong nungsa shia lir.

ACAUT-i NSCN-IM dang telangzüba meshir

Dimapur, June 18 (TYO): Dimapur aser Kohima tsüingda 4-lane mapa inyakba contractor tem indang osettem rongdoktsütsü amokmeren ta osangkakettem nung sangdongaka, NSCN-IM tsütsü nungi iba dak sendakba osang kecha malinung ACAUT Nagaland-i iba nung NSCN-IM züingsemtem dena lir ta bilemer.

Ajisüaka, ACAUT Nagaland-i NSCN-IM nem anogo asemnü tsüingda telangzübatem agütsütsü atema mapang atakzüksür, ta Media Cell sangdong ka nung metetdaksüügo.

"Asian Highway-1 nung four lane yangluba contractor tem dangi NSCN-IM-i tashiyim agi saru meshi asü? Meshia lira, nenoki India sorkar den yimjung olemtep tatembang kati maru tashi Nagaland nung terenlok mapa inyakba ajak nokdangtsü indang tebilemba kar lir asü?" ta ACAUT-i NSCN-IM dang

asüingdangogo.

NSCN-IM nung ochimashi züingsem kari kari 4 lane mapa anentsü asü. Iba ya shitak süra, nenoki ochimashi züingsemtem dak kechi mapa inyaksü aser Nagaland nung alirtemi metettsü atema nenoki ochimashi züingsemtem indang temettsü aser parnok inyakba menden yimjak nung metetdaksütsü asü? ta ACAUT-isa asüingdang.

NSCN-IM-i anogo asem tsüingda temalen agüja aliba onüktem atema telangzüba agütsütsü takhangba agütsür. NSCN-IM-i mapang agütsüba tsüingda telangzübatem magütsütetra, parnoki Nagaland nung terenlok mapa meinyakdaksünür ta angajemtsü aser timtem odangsa agütsüra, ACAUT-i bangdak ketdangsertem dang mepishitsüsa aküimtsü, ta Media Cell sangdong nungsa metetdaksü.

(Maneni tapak 12 nung...)

Kalimpong nung GJM-i tasümang 2 bener lungkak ait Rajnath Singh-i Darjeeling nung yimjung alitsü ayongzük



Deobarnü Siliguri anasa Sukna tesem nung GJM pusemertemi lungkak aitba sentong ka agiba angur.

Darjeeling/New Delhi, June 18

(Agencies): Deobarnü Kalimpong nung lungkak aitertemi public library ka, panchayat office 2 aser police gari ka mi agi rongdoktsü saka Gorkhaland takhangba atema tesepti Darjeeling nung tatalokba kecha maliasü.

Gorkha Janmukti Morcha (GJM) züingsemtemi tanü Honibarnü police-i kasetba mang ana bener yimdong nung lungkak aitba sentong ka agi.

Anogo ananü tsüingda Union Home Minister Rajnath Singh-i West Bengal Chief Minister Mamata Banerjee den anaben tashi phone ajanga osang metetpela aser pai lungkak aitertem dang ozüing alema meinyaksü saka olemtep agi angatetteptsü mepishia

metetdaksü.

GJM-i mapang telatet makai mokdangtsü ayongzükba sülen anogo pezübuba nung, Deobarnü Kalimpong nung kakatnang ka, panchayat office 2 aser police indang gari ka mi agi rongdoktsü, ta police-i metetdaksü.

Ajisüaka, GJM-i item tatalokba nung parnok maden saka Trinamool Congress (TMC)-i parnok tenüing menüktsütsü nükjidong nung inyak ta tai tongloksü.

Lungkak aitertemji Chowkbazar nung adenshi aser idakji Gorkhaland state tentettsü takhangba agüja yimyim ayim. Parnokisa Darjeeling nungi police aser sepaitemi anientsü atema takhangba agütsü.

Parnoki tasümang anaji bener aser GJM indang wako o poster

tem amer yimdong nung lungkak aita senzü.

Tanep 9:00 ako nungi Darjeeling nung Internet services shibangogo. GJM züingsemtemi social media amshia osangtem belenshiba aser taittsü aketba osangtem prokshiba nokdangtsü atema iba mapa ya inyaker, ta police-isa metetdaksü.

Muslim nungertemia tanü Darjeeling nung yimjung bener arutsü aser Gorkhaland tentettsü atema takhangba agüja lungkak aitba sentong ka agi.

Union Home Minister Rajnath Singh-i Deobarnü Darjeeling nung Gorkhaland state balaka tentettsü atema takhangba agütsürtemi ozüing alema meinyaksü aser yimjung nung alitsü atema mepishia metetdaksü.

(Maneni tapak 12 nung...)

Angh Acharya-i Naga kaketshir lennir aser entrepreneur tem den ajurutep



Dimapur, June 18 (TYO): Nagaland Angh, P.B. Acharya-i Nagaland House New Delhi nung kaketshir lennirtem aser Naga entrepreneur tem den ajurutepa senden ka amen.

Iba mapang Angh Acharya-i Naga kaketshir lennirtem aser entrepreneur telok ayongzüka jembidang, "nenok kija mesüra union/telok atema masü saka nenok ajak ya asen state atema ambassador ka ka lir" ta ashi.

"Nenok yangi Delhi nung alibaji jenjang tajung ka lir.

Nenek kaketshir mesüra shishilembar temi state aser centre atema Nagaland House ya tongti tesem ka ama amshiang" ta Angh-isa ayongzük, ta Nagaland House New Delhi, P.R.O. Kuolie Mere-i sangdong ka nung metetdaksü.

"Nenoki nür state - Nagaland ya linük nung tepelatiba state ka kümdakjang. Ni nenok den ni akokba ajak agi yariteptsü mulunga lir" ta paisa ashi.

Angh-i parnok den ajurutepba atema kaketshir lennirtem aser entrepreneurs teloki pelaba metetdaksü. Parnokisa Angh den Father's Day salem lemsatop, ta sangdong nungsa shia lir.

Iba senden nung Resident Commissioner Nagaland House New Delhi Abhishek Singh, Deputy Secretary to Governor George, ADC to Governor Maj. Abhishek Biwas aser Nagaland House New Delhi PRO, Kuolie Mere nungertem aden.



Nü VOTE

Enoktsütettsüsa anguba nüchiso jenjangji
Tongtibang temeten ka dangbo masü,
Saka nai nü tarutsü tia shimtetba mapa ka lir.

25 Nagaland Independent Company NCC Mkg Training Camp tenzükogo



Mokokchung, June 18 (TYO): Mon, Longleng, Mokokchung, Tuensang aser Zunheboto district tem nungi NCC Cadets Boys (Junior & Senior Division) Annual Training Camp June 16, 2017 nü CRPF Barracks DEF Camp, Mokokchung nung tenzükogo.

Iba traning nung Cadets 423-i shilem agia dendar, aser cadets ji FAC Mokokchung, Sao Chang College Tuensang, Govt College Zunheboto aser Yingli College Longleng nungi lir.

Junior cadet temji timbaka

Govt High Schools aser Govt Higher Secondary School tem nungi lir.

Iba Camp nung Outdoor practical training kübok: 'Drill with & without arms' alitsü aser Delhi nung Republic Day parade atema candidates shima tembangtsü, 'Obstacle Course aser Map Reading' alitsü aser Thal Sena Camp atema candidates shimtsü, 'Rifle aser Shooting Practice' alitsü aser Shooting Competition balala nungi shilem agitsü atema candidate tajungpurtem shimtsü.

Iba den külemi iba camp

nung department balala kübok item sentong akatsü; anepdang PT dak sendakba nung Yoga, NIC Mokokchung ajanga Digitization, Electronic Payments, Adhaar card aser Security dak sendakbatem, Blood Bank Mokokchung kübok Blood Donation Camp, Home Guards MKG kübok Disaster Management, Traffic Police MKG kübok Traffic Rules, AEO kübok Elections & Responsibility, Fire Brigade Mokokchung kübok Fire Fighting aser District Hospital MKG kübok Tree Plantation alitsü.

Chetheba yimdak anogo 5 nü aluyimertem training temogo



CIH, Medziphema den District Horticulture Office, Phek senteper Phek district atema aluyimertem asoshi anogo pongnü training Chetheba Village nung alidang tongti tesemdang, aluyimertem aser shisalen sayurtem külemi tangokba noksa nung angur.

Dimapur, June 18 (TYO): Central Institute of Horticulture (CIH), Medziphema den District Horticulture Office, Phek senteper Phek district atema aluyimertem asoshi anogo pongnü training Chetheba Village nung ayonga akaba sülen May 30, 2017 nü tembangogo.

Iba training tetenzük sentong nung tongti tesemdang Vety. Asstt. Surgeon, Chozuba, Dr. Menguzenuo Chielie-i nisung aser shiruru naprong atema horticulture chiyungtsüji koda tongtibang, iba indang lemsatepa liasü.

Laisa aluyimertem dang mixed farming ayimtsü ajungshiba den külemi sustainable development atema meranga inyaksü ajungshia

liasü.

Technical session nung CIH nungi Asstt. Horticulture Specialist, Shisarenla Aier-i CIH-i inyakba mapa balala metetdaksü aser institute-i agütsüba skill development course balala atema aluyimertem tenüng agütsütsü pelashishia jaok.

Laisa Chetheba tesem nung somomo/mongu tsünütsü ajungshia liasü.

Ano horticulture department nungi shisalen sayur Horticulture Officer, Phek, Senti Longchar (DK)-i, Chetheba tesem nung motram (guava) tsünütettsü, kechiyong iba tesem ya iba süngjang atema tzü-mopung aser ali tapet lir, ta metetdaksü.

Shisa lemsatepba aser o lemtepa mapang nung

aluyimertem tenteti chiyungtsü akongba aser process asüba unit indang metetnua asüngdanga liasü.

Phek Farmer's Union (Chetheba Unit) secretary-ia aluyimertem inyakba mapa balala metetdaksüba den külemi department dang sensaker aluyimertem ajanzüktsü atema akokba lenmang ajak agi aluyimertem yaritsü mepishia liasü.

Pfutsero Govt. College-ia CIH aser DHO Office Phek dang Floriculture atema special training programme ka agütsüba atema pelaba metetdaksü.

Yimtsüng balala aser institution balala nungi shilem agir parnok nisung 250 nem certificates agüja iba sentong tembanga liasü.

Sorkari Vocational Training College 40 lapoktsü: Manipur CM

Imphal, June 18 (Agencies): Manipur Chief Minister, N Biren Singh-i principals aser tesayurtem dang state nung sorkar kaket rijutem ajungkettsü atema kanga meranga inyakdaksüner, ta metetdaksü.

Board of Secondary Education, Manipur (BOSEM) aser Council of Higher Secondary Education, Manipur (COHSEM)-i ketdangsia agiba class 10 aser 12 tatidang nung toppers nem sempet agütsüba sentong nung jembidang Singh-i, "Tanü-asüngbo state nung tsüraburtemi tanurtem shisaliok atema sen jenti indoker," ta ashi.

"Iba ya, talisa coaching aser tuition agiba sobaliba tenzükba den külemi sorkar rijutem jenjang mejungi akumba ajanga lir," ta paisa shisem.

Chief Minister-isa, sensakertem sen kanga meindoki parnok chirnurtem nem shisaliok tajung agütsüner, ajisüaka sorkar rijutem jenjang mejungra ibaji mataloktsü," ta ashi.

"Health aser infrastructure/communication sector dak alia sorkar tasenbai shisaliok sector nunga nendaka inyaker, ajisüaka tesayurtemi meranga meinyakra ibaji tamakok ka asütsü," ta paisa ashi.

Education sector ajungkettsü

nükjidong nung state sorkar tasenbai anogo 100 sentong nung school 50 züngokogo (SSA kübok school 41 aser RMSA kübok school 9).

Kobi melii sorkari vocational training college 40 lapoktsü sentong lir, ta metetdakja chief minister-i, item course nung school züngtur anenertema züngoktsü atema jembidar, ta metetdaksü.

"State nung school züngtur anener jenti lir aser iba ya ajanga mapa manguba tebilemstü tuluba kümdaksür," ta paisa ashi.

CM-isa, sorkari kobi melii Imphal East district atema District Institute of Education and Training (DIET) centre ka amenoktsü, ta metetdaksü.

"Tekaraba nung Directorate of education kübok tesayurtem aser rijutem nung tekolakpurtem transfer asütsü atema maparen ka tenzüktsü," ta paisa metetdaksü.

"Shisaliok asüngsashitsü aser nija school tem den coaching centre aika lapokyonga aoba azüoktsü atema taruba assembly senden nung Manipur Private Schools (Registration) Bill, 2017 aser Manipur Coaching Institute (Control and Regulation) Bill, 2017 benoka jembitsü," ta pai metetdaksü.

Assam Police nung nisung 9,000 shimoktsü

Guwahati, June 18 (Agencies): Assam Police-i, tang state police nung mapa tazüng 12,000 lir, aser taküm küm tatemlen tashi nung nisung 9,000 bo police force nung shimoktsü, ta metetdaksü.

Honibarnü State Level Police Recruitment Board chairman aser Director General of Home Guards, Pradeep Kumar-i, "Tang non-gazetted officers post 12,000 tazüng lir, item rongnungi post 8,000 bo constable ranks lir. Iba dak alia DSP post 79 aser inspector ranks 154 tazüng lir," ta metetdaksü.

Paisa, taruba ita tashi nung post 3,980 nung nisung shimoktsü, ta paisa shisem

"Sorkari onok dang post balala atema nisung 5,013 shimoktsü asüngdangogo. July-August ita nung onoki item post

atema advertisement agütsütsü aser iba maparenji taküm küm tembang tashi nungbo tema inyaksü," ta Kumar-isa ashi.

"Onoki recruitment policy tasenba atar. Onoki temelenshi kar benokogo, aser item rongnung backward tesemtem atema shilem 10 shiteta yutsütsü, sports atema shilem ana shiteta yutsütsü aser temai adokba telungpur atema shilem ana shiteta yutsütsü densema lir. Tang tashi nung sorkari iba atema telemteba agia mali," ta paisa metetdaksü.

"Onoki Centre dang India Reserve battalions asem tentetstü asüngdangogo. Ibaji agizükra police force nung sepa 3,000 tali bendenloktsü," ta paisa shisem.

Assam Police nem nisung 74,000 lemzükja lir, aser iba nungjagi post 12,000 bo tazüng lir.

OFFICE OF THE All Ward Union Mokokclung Town Mokokchung: Nagaland

Office of the All Ward Union Mokokchung 17th June 2017 anogo Presidential Council meeting nung telemteba agiba nübur ajak dang sangdonger. PHED den All Ward Union Office ajanga 'tzü tebilemstü' den 'meter rent' atema jembia aser tezüluba ajanga inyaka aruogo, iba dak sendakba nung tangatettep tajung kati maruteti lir, anungji tangatettep tajung kati maru tashi Mokokchung nung aliba nübur shingaiä tzü bill magütsü atatsü AWUM (All Ward Union Mokokchung) office ajanga metetdaksür. Nübur shibai tashi mangai bill agütsüdir, pa/la kija khu asütsü ta sangdonger.

Sd/-
R. Ayim Lkr.
President
All Ward Union Mokokchung

Sd/-
Lanumeren
General Secretary
All Ward Union Mokokchung



Balimukh, June 18 : Assam, Morigaon district kübok Balimukh yimtsüung nung tzü agi metsüungbanger aliba tesem nungi tesem tajungba ka bushia rong ajanga nisung belenba noksa nung angur.

Kangpokpi nung tetsür lokti-i longkak ait

Imphal, June 18 (Agencies): Kangpokpi Women Welfare Organization kübok kin aser lokti balala nungi tetsür noklang aika sentepa tanü district yimtiba nung ozüing alema rakzükraktemba aser takhangba tem anema mener longkak aitba sentong ka agiogo.

Tetsür lokti ya tanü anügang 11 ako shi nung adenshia, sorkar ketdangsertem, kicha, shishilembartem aser highway maintaining agencie tem dang sen akhangba ken o nung tatsü talang asateba o lemtepa liasü.

Iba sülen parnok Kangpokpi jila nung shishilembaba tongti tesemi ao aser idakji district nung telungpurtemi lokti anema maparen balala inyakba parnoki aitsür, ta sayua mener longkaka aitaba sentong ka aka. Shishilembaba tesem nung

dokan, hotel aser tanga shishilembadak ajak shibanga liasü. Tetsür lokti-i placard nung onük balala zülur longkak ait.

Osang ka ajanga ashiba agi, nokdanga aliba telungpurtemi forest aser power department tem den külemi highway maintenance agencies, shishilembartem aser ano nisung kar dang nungi sen meshia liasü.

Maneni telungpurtemi forest aser power department dang nungi sen lakh metsütsü akhanger aser shishilembartem dang nungi mapang aben sen 1500 nungi 4000 tashi akhangba kasa osang ajanga metetdaksü. "Telungpurtemi onok mapangshia amokmerener. Onok yimjung nung meliteter aser timba ka atsüka dang alir. Onok parnok kabuma nung kanga kangshir aser tangar ama

sunepa meliteter," ta shishilembartem kati ashi.

Kasa mapang nung Kangpokpi Women Welfare Organization-i iba tesem nung aliba telungpurtem dang ozüing alema sen akhangba aser rakzükraktemba anentsü asoshi metetdaksüogo aser parnoki teka amteper meinyakra tetsür lokti-i iba anema maneni nokdaksü ta amokmeren.

Maneni tetsür lokti-i department ketdangsertem, shishilembartem aser nüburtem dang tarutsü nung Kangpokpi nung telungpurtemi parnok dang nungi sen khangra idangiisa KWWO nem metetdaksütsü asoshi mepishe.

Maneni iba lokti ajanga lanurtem jila nung kecha kuli melei aonung menoa mesenzütsü asoshi tekümdangtsü agütsü.

Assam CM-i Pradhan Mantri Ujjwala Yojana amenoktsü

Guwahati, June 18 (Agencies): Assam Chief Minister Sarbananda Sonowal-i Deobarnü Pradhan Mantri Ujjwala Yojana amenokogo aser Majuli nung iba teyari angurtem nem LPG connections agütsüogo.

PMUY amenokba mapang Sonowal-i ashiba agi, "Pradhan Mantri Ujjwala Yojana ya tekübok tia nung aliba tetsürtem ajungkettsüba, talisa yimadak yimtsüung nung alirtem koba Ato kilonser Modi nukla lir, iba den kanga dang puteba lir aser iba ajanga

environment tajungba ka agütsütsü."

PMUY amenokba sentong metenzük tsüingda CM Sarbananda Sonowal-i Majuli nung Majuli aser Jengrai-Haldhibari lenmang nüngshilong azüingja liasü, "Iba lenmang ana tajungba küma yanglushiba ajanga tesendaktep tajungba akümtsü," ta pai ashi.

Honibarnü CM-i Majuli College auditorium nung Majuli district nungi HSLC aser HS tatidang nung jenjang tajung nguteter, distinction aser

star mark angurtem nem tetushi agüja liasü. Iba sentong nung CM-i ashiba agi, "Kü constituency nungi kaketshirtem wadang balala nung takok anguba ngua ni kanga nematanga bilemer."

Pai maneni Majuli ya Assam ajunga atema tanülairen ainba aser tangatetba nung renlok aoba tsütsü ajak atema nukrangtong ka asütsüla, ta ashi. Iba dak sendakba nung pai kaketshirtem dang district nung terenlok maparen balala asadanga alitsü asoshi aser meranga inyaktü atema ajungshi.

Gorkhaland akhangba ABSU-i pusemer

Kokrajhar, June 18 (Agencies): All Bodo Students Union (ABSU)-i Honibarnü 'Gorkhaland' akhangba pusemba metetdaksüogo aser parnoki tang Darjeeling nung mepetmesü adoka aliba ya West Bengal aser centre sorkar makümba ajanga ta tongloktsüogo.

"Darjeeling meketa aliba tesem nung mepetmesü adoka aliba ya Bengal sorkar-i amokbanger yimsüasüba aser Centre sorkari tebilemstütem temolung magütsü toktsüba ajanga atokba lir," ta ABSU tir Pramod Boro-i Darjeeling nung osangbenertem dang ashi.

Pai ashiba agi, Gorkha Janamukti Morcha (GJM) takhangba ya putiotsü aser linük temzüng kübok tim takhangba ka lir, aser iba takhangba ya shidak aser ochi takhangba ka lir.

"National Federation for New States (NFNS) nung züingsem ka ama onoki Gorkha nungeri Gorkhaland akhangba pusemer," ta Boro-i ashi.

Ajisüaka ABSU leniri GJM

lenirtem dang democratic yimya nung aser yimjung nung azü medokshi-i nüburtem anitsü asoshi mepishe. Pai ano Bengal sorkar dang iba tesem nung yimjung bener arutsü asoshi mepishi.

ABSU-i maneni Centre sorkar dang iba ken o nung teka ia Gorkha nungeri Gorkhaland state ka akhangba agüja iba tesem nung teti asoshi yimjung bener arutsü asoshi mepishi.

"Onoki Centre-i iba ken o reprangshitsü asoshi akhanger kechiyong iba ya election madong tsüingda BJP pur tenangzükba ka liasü aser ano party central committee-i iba ken o nung parnok tebilemba jangshitsütsüla," ta paisa ashi.

ABSU-i Bodoland state balaka akhangba dak sendakba nung Boro-i ashiba agi, Centre aser state sorkari parnok takhangba tangsa mataloktsüra parnoki longkak aitba sentong; mapang telatetka makai national highway aser train lenmangtem mokdangba amala, September ita nungi tenzütsü.

Karbi council election nung nüburtem shilem 70-i shilem agi



Nüburtem vote agütsütsü atema Honibarnü Dipu nung polling boot ka nung nokdaker alidang tangokba noksa nung angur.

Nagaon, June 18 (Agencies): Karbi Anglong Autonomous Council election nung nüburtem shilem 70-i vote agütsüogo. Tsüingsang mejungi anogo tepeyong tziunglu aruaka nikongtsütsü 4 ako tashi nung nüburtem aikati arua shilem agiogo.

Ajisüaka Karbi Anglong district headquarters, Dipu nung tziunglu medangi aruba ajanga voter tem aikabo maru.

"Lumbajong primary school nung 10:00 ako tashi nung nisung 20-i dang vote agütsür liasü. Tziunglu tera anenba sülenang nüburtem vote agütsütsü asoshi nokdak," ta district ketdangser osang ka ajanga metetdaksü.

West Karbi Anglong nunga polling station 257 nung voter tem tziunglu aruba ajanga 11:00 ako tashi kanga azüingja liasü.

Autonomous council constituencies 26 nung vote anepdang 8:00 ako nungi agütsü tenzü.

BJP's chief executive member, Tuliram Ranghang-i Bithung Rengthema High School nung pa indang vote agütsü aser Dipu legislator Sum Ranghang-i par kibong den külemi Raja Pathar High School nung vote agütsü.

"Ni ochishiba aser nüburtem meimba yimsütsüba yimya ka

aginer. Ni inyakyim nung temelenshi ka atema vote süogo," ta Bithung Rengthema nungi arishi küm 19 tain Larsika Englengpi-i ashi.

Englengpi ya tangang mezüngbuba vote agütsür aser West Karbi Anglong district nung terenlok bener arutsü asoshi temelenshi ka nüngdakba pai lemsatep.

Iba election nung Hills State Demand Committee (HSDC), Congress aser BJP tongti tetokteperitem liasü.

Autonomous State Demand Committee (tang HSDC)-i 1986 nungi 2001 tashi yimsütsüba liasü. 2001 küm HSDC nung telemsa adokba sülen 2001 küm Congress-i yimsütsüba menden kümteta liasü.

Yaküm June ita Congress nungi züingsem 15 aser HSDC nungi züingsem 6 ta BJP nung aden aser BJP-i aniba sorkar ka kümtet. Küm ka jakdang Congress lenirtem BJP nung adenertem atema iba ya mezüngbuba election lir.

Election osang June 22 nü agütsütsü.

Polling station 379 nung election kanga sunepa agiogo, ta Karbi Anglong deputy commissioner Adil Khan-i metetdaksü. "EVM tem June 22 tashi kanga junga rizüingja ayutsü," ta paisa ashi.



Guwahati, June 18 : Honibarnü Guwahati nung 19buba Foundation Day aser Apollo Hospital anemokba mapang, Apollo Hospitals Enterprise Limited, nungi Jt, MD, Sangita Reddy, osangbenertem den sensaksemba mapang tangokba noksa nung angur.



TIR YIMYIM

YIMOBILEM (EDITORIAL)

DIMAPUR MONDAY, JUNE 19, 2017

Nashi shi dang masü

A tangji, akok nungbo nashi shi dang masü saka kecha shia machi tajungba, kechiyong shiruru tapu balala shi achiba ajanga asenok temang ya shiruru leper ama kumadoker. Ibaji tesempatsüka. Ajisüaka, nisung ya shi achiba shiruru mesüka yanglua lir, iba jagi tanü ama nisungtem nüchi makümba putu nunga shi aser ango chia taküm lia aru. Iba jagi tamangba yimsü kar dak alaka tamangba yimsü teimbai shi achitsü melar. Atangji, shi achirtem rongnunga kari ak shi machir saka ano karibo shi tapu ajak achir. Aji oda, Khristan purtem asoshi tasen Laishibai teyubajibo kechi chiyongtsü chidir aser jemdir, ibaji Tsüngrem nem tenüngsang agüja chiajemtetra, ibaji Tsüngrem tsüngdang tagizüktetsü asütsü. Anungji, Khristan-tem asoshibo kechi shi achitsüla aser kechi shibo machitsüla, iba list-jibo mali saka ibaji pei tamang aser tangatetba dak keta lir. Iba amaji tanü India nung BJP teloki aniba center government-i nashi metepsettsü ozüng azüngbaji shi mechidaktsünüba otsü masü saka tamangba yimsü dak ajemdaker inyakba mapa ka lir. India ama ka asoshi ibaji kanga lendong lir, kechiyong India ama kin kidong aser tamangba yimsü alima nung aliba ajak amenoka aliba lima ka nung yimteni sensosanger asoshi chiyongtsü list (menu) yanglutsütsü makok. India lima nung alir sensosangertem ya Tsüngrem dak mamangnüra mamangtsü aser amangnüra kechi yimsü amangnüdir amangtsü asoshi temzüngi temeten sademsadema lapokja lir. Ajisüaka, kodang teimbai amangba yimsü kübok sensosanger ajak ayutsü merangdir, ibaji linük temzüng anema yimteni inyaker asütsü aser iba jagi India ya linük aika kuma lemsa tenzütsü. Kechi yimsü südir süang tamangba yimsü yabo kangshia amangdaktsütsüba mapa ka masü. Akhidang, asenoki Naga lima anüdoklen alirtem kar amokmerena kangshia amangdaktsüba agi tang tashi parnoki Khristan yimsü yabo tashiyim agi inyakba tetsübuttsü yimsü ka amato bilemer. Aji oda, Nagaland nung alirtemi "Nagaland ya Khrista Asoshi," ta pangzüng kuma latetaka, Nagaland nung alir ajak tashiyim agi kangshia Khristan kümdaktsütsü ta masü saka akok tashi Yisu Khrista dak mamangertem dang Tsüngrem temeim shia temeim agi temulung meyipdaksü tenangzükba agiba mapa ka lir. Iba kasaji India nung Hindu nungertem dak tangatetba alitsüla. Ajisüaka, tangbo All India Hindu Conventioni anir India ya Hindu lima ka akümtsü tangatetba aser telemtetba lir. Iba jagi Hindu nung masürtem temulung kanga yirutsüogo. Aji oda, nashi metepsettsü aser nashi shi mayoktsü aser bener mesenzütsü temzüng azüngba anema tesem balala nung lanur aser kaketshirtemi longkak ait tenzükogo. Nagaland nung ola madoker dang ashi asenoki Meghalaya aser Mizoram nungbo linük nung nashi metepsettsü ozüng agütsüba anema nashi shi benjong ayongzüka amongba nguogo. Tanü India lima nung Khristan-tem asoshibo tamang tendangba mapang ka amato kümogo. Aji oda, sen ngura ojang mesüra Ruling party nung denra ojang ta asüba tejangraba aser tangatetba dak alaka asenok ya Khristan-a ta asüba tobo amadokogo. Ashiko, aoksa Deobar arudang khenkhen bilemteta alitsüa akok. Ajisüaka, küm noklang ka jakdang asenok shiruru ama tia nung tetsübu agi sünger tesamar lia asenok kümzükba kibur kümtetdakba aser tamangba yimsü asenoki amadokra, asenok asoshi ibaji atakatem meshir asütsü. Tanü asenok tera tangar mesüka aliba ya asen tsüraburtemi Khristan yimsü agizüker, iba kasa temeimji tangar dang sayua Tsüngrem mapa inyakba tejang lir. Ajisüaka, asenoki asenoksasa nisung aküm ama bilema tangar tamangba yimsü agi aniba yimten nung shilem agira, asenok tamasaba tia dang nungi tamangba tia ai tsü. Asenoki linük nung nashi metepsettsü aser nashi shi mayoktsü aser nashi shi bener mesenzütsü ta asüba ozüng anema nokdang dang, nashi shi chinüba agi masü saka temeten akaba senso aka ama tangar tamangba yimsü nem asenok malendaktsütsü asoshi arangoktsür amai inyaktsüla aser tamangertem tasü ittdakja ajungshiteptsüla.

OLEMSABANG

Oshioben tsütsü kü tangatetba kar

- Talitemjen Imchen

Ao oshioben (literature) tajungba asütsü atema, temetonglen (correction) aikati pei pei aginüba züluteper. Aser aji Ao oshi nung asen kibur, temeden idakji lir ta bilema tajungtiba kümdaktsünüyong lemsateper. Saka kodang asen oshi ya samar tangar oshi nung tamendakdak kuma jembitsüsa kümdir, iba mapang jibo aseni achitetaka parnok dang asüngdangtsüsa akümtsü mesüra kiburi asen artsütsü.

Aor oshioben ya ken dang agir yutsütsüba ka masü. Ano aikati molunger ta sür amshiba ka masü. Saka olong taoyim aser tetenzükyim ji junga alitsüla. Tsüngküm shiruru balalai asaba ajanga tsükrem kabo metetdaktsür ta kenteta jembiba ama, mashi kati osang kaket nung zülutsüba ajanga tsükrem kabo angazüker. Anungji ajaki ocet ka züluba ajanga mesüra jembiba ajanga, onük ka ji tabensabensa akümer aser tejakleni odar ta angateter. Ao oshioben tsütsü apongmen/tamendakdak ji reprangdangra, Missionary E.W Dr. Clark aser kinüngtsü dang kanga pelatsü lir. Tanü alima ajonga nung zülumen tapu aika liaka, ajaki sapua amshiba Roman zülumen (script) nung Ao oshi yanglusemetsüba ji tajangzük tulu lir. Süngzü tali agi naipangra, süngdong karaa mainba ama, tanga oshi Hindi, Assamise etc.... parnok pei pei zülumen aliba ajanga, asenok dang nungi Roman aser English zülutsü tasakba akümer. Yamaji asenokbo pei tetsü oshi ji Roman zülumen nung yanglur aka nung, tangar dang nungi asen nisungi English angazüktsü temelaba akümer.

ASLBI tawa convocation sentong alidang, kulio (certificate) nung nungyu ta olong tasen kuma amshir aliba ji, nibo nungo tasa amshi tajungba ta bilemer. Nungyu tetezü tenüng ayu nungi bener aru südi? Kodang nungyu ta olong ji amshidir, NÜNGYU AYU ta oren ji arutsü aser olong ana ji nungrep akümer. Ano nungja/olong ji ayutsüba dang ta angateter. Saka NÜNGO OSET ajak ji ayutsüba dangbo masü ta metetdi. Kar nungo süa amshir, kar nungo süa agir, kar nungo süa azünger aser kar nungo süa ayur. Kodang nungyu ta olong ji agidir, oren ka nung dang amshiteter. Asembo meperir. Tanüngbatem atema olong tasen bener arudangji, olong ka tetezü ji tebenja akümtsü. Aser nungja ji taret masü pongpaa kümdaktsür.

Yim karibo NEKONG ta jembir, koba tetezü ne indang mesüra oset ka jagi, ani akonger ama teti metetdaktsür (osang agüjaa bilemtetdaktsü). Olong ji nekong jiang tabensaba lir. Saka oshi temelaba tsütsü nungi yanglutsü atema nungo ji kanga tapet lir. O agi atemba kar olong yamai amshi nung jungdisü:- Kulio (certificate), Nungo (Souvenir), Kongkikeno (Music), Kaketkeno (Education), [(Education-shisaliok) ta amshiba nungi tajungba. Shisaliok ya comprehension ta amshitsü jungdisü. Tatishitsü shisaliok tendang (comprehension test)].

Kopangtsüng, temko, konang aser ko (hair) item olongtem züludang lirumedema "o" amshitsü junger. CHIEF GUEST Ao oshi nung meyiper züludang, Tongdi Tesemdang ta masü Tongdi Jaoker/Tongdi Tejaoker ta amshitsü junger.

ASLBI September 20 2016 osang kaket nung zülusü (spelling) teti amshiba olongtem kar melenshitsüba nung olong ka agiteter kü tangatetba ka lemsateper. President dang Ao oshi nung "Dir" ta amshitsü apitetba ya shibai tamasa bener aruar ni memetet. Saka Ao oshi nung meyipa bener arur jagi, apijema bilemer bener aru südi ta tamang akar. Aser olasü züluyim (spelling writing) nung D agi tenzuka amshitsü yanglusemba ji kanga junger. Kechiaser parnok mapang Ao oshi nung züngyazüngko, ti (8) aser tir (80) adoktsü olasü yangluba ji kangasa azüki tua yanglu aser tanü tashi olasü ji azüklen amshidaki.

President dang Ao o agi Dir ta amshia aruaka, netsüng kari lirumemedemi Tir aser Dir ta amshitsü tenzük. Tanü tashi nung shirnoki Tir ta amshia arudar, item jiang ASLBI metongshitsütsü nungdaka lir ta nibo bilem. Saka kechi tangatetba agi ASLB ang melenshitsüsa akümar nibo süngmanga bilemer. Dir nungi Tir ta melenshitsüsa ASLB züluyim nung akümba ji, alima dang angatetdaktsü nungbo angateta rajemtsü imlar. Dir nungja (noun) kuma bener aruyim ji, tatishitsü agi:-, imladir, inyakdir, jembidir, kümzükdir, nungitdir, odir, senzüdir, yaridir etc. item nungi lir ta bilemer. Külen tsütsü reprangdangra, yim kari horn dang ya dei ajar. Ano shiruru rongnung tambusang/tantsüla aser tulutiba danga deila/dei ta ajar. Item olong ajak ji "D" ojangi awapanga lir.

Asen oshi renloka aoba mapang ka, nia D aser T sendakba olong kar nungi lirumedema bener aruner. Tang asenoki lirumedema amshia aruba ji lokti, jenti, senti, tulutiba aser yimti etc ta amshia arudagi. Item olongtem nung "ti" ta aliba ji "Di" ta melenshia amshitsü junger. Lokdi tetezü telok rongnung tuluba. Jendi tetezü tsük aika mesüra jen rongnung tuluba. Sendi tetezü tasen (new) rongnung tuluba. Tuludiba tetezü tulu rongnung deiba. Yimdi tetezü yim rongnung tuluba. Engraji nung "Biggest" olong ji Ao oshi agi meyipdang D agi tenzüktsü tim ji lir. Temalen olong meyipzuka yanglurtemi, olong nung züluyim kanga tobur junga yanglusemba kar. Tatishitsü agi: - inyakdi, mendendi, merükshidi, renemdi, tebudi, yangludi.

Iba Olemsabang nung lemsaba ken-o aser shisatsü ya iba ocet zülur-i bilemba ken-o ama tazünger-i angateta agitsü mepishir



June 18, 2017 nikongdang Dimapur Ao Baptist Arogo kübok Yinsem Fellowship nung Baptist Youth Fellowship Dimapur Nagarjan Area sentong agidang tangokba noksa angur. Iba sentong ya 'Challenges Facing Youth Today' omen nung ajemdaker agi aser Tsüngrem O jembirji Sangtam Baptist Church Purana Bazaar Pastor, Dr. Apise Iasü. Sentong nung Mao Baptist Church, Yimchunger Baptist Church, Kuki Baptist Church, Kuda Village Baptist Church, Thangkul Baptist Church, Valley View Sumi Baptist Church aser Kachari Baptist Church nungi lanur 500 shi adenshia shilem balala ajanga Tsüngrem tenüng sanga Iasü.

Uttar Pradesh nung Khristantem dak tashiyim mapa inyaker

June 18, 2017: India kübok Uttar Pradesh state nung Hindu nungertemi Khristan yimdaklir kar tashiyim agi Hindu külemküja südaksü aser tzü magütsür, ta osang ka ajanga ashi.

Ghazipur district kübok Jalalabad nung yimdaklir kibong pezü dak iba mapa ya inyaker aser parnok alu aliyimsü atema tzü magütsür.

"Tsinüsenbongtsü anepalu mesüetra, onok kodaser alitsü?" ta Sasikala Kumari-i osangbener dangashi.

Yimtsüng nung mendenbuba aser police temi Hindu nungertem parnok alui bener aoba tzü shibangtsü temelaba agütsüogo, ta laisa ashi.

April 25, 2017 nü Hindu nungertemi Manoj Kumar, pa kinungtsü Pushpa Kumari aser Khristan apunani asem dak züka merenshi. Parnoki Hindu nungertem Khristan yimsü dangi meyipdaksür ta tai tonglokja merenshi.

"Yimtsüng mendenbubai anir telok jagi onok nem tashiyim agi gangajal (Ganga ayong tzü) jemdaksütsü, Hindu nungertem atema temeshi ta züngshiba tulusi tou achitsü aser onoki Khrista magizüker ta shidaktsütsü merang" ta Pushpa Kumari-i osangbener dang ashi.

"Onoki parnok dang ma ta ashidang, parnok onok dak tali

züka merenshi" ta laisa shisem. Apunani pezü den tanga tamanger pezü Hindu nungertem külemküjaba meinyaktsü aser Khrista mesentoktsü atema tekong meranga nokdak. Ajisüaka, Khristan lanur 13-ibo Hindu nungertem külemküja asütsü aser Khrista sendoktsüsa aküm, ta parnokisa metetdaksü.

Khristantem jagi Dullapur police station nung ken o ka benoktsü atema ao saka yimtsüng mendenbuba Santosh Kumar Gupta-ia police station-i aru aser parnok dak tashiyim amshia tamangba yimsü melendaksüba ken o benok.

"Yimdaklirtemi onok anema nokdak, onoki tashiyim agi temulung meyipdaksür ta parnok tiyazü nung tai tongloktsü. Police-i yimdaklirtem dang pei Dharma (tamangba yimsü tesayuba) sülen anidaksü akok aser tenlakidang timtem magütsütsü ta ashi" ta Manoj Kumar-i osangbener dang metetdaksü.

Yimtsüng mendenbuba lia Hindu yimertemi police-i ashiba ama inyaktsü ta nangzük aser iba jagi telok anaprongi ken o mebenok. Ajisüaka, iba tenangzüktep nung water service indang dena maliasü aser iba jagi yimdaklirtemi Khristan pur nem

tzü magütsür. "Iba jagi onok nem tzü magütsür. Onoki tzü indang taa agütsütsü mulunga lir, saka yimtsüng mendenbuba aser tanüngba yimdaklirtemi onok nem tzü magütsür. Onok indang alu kongogo" ta Manoj-isa shisem.

"Onoki yimtsüng mendenbubu'er kidangi anaben tashi ogo, saka pa kinungtsü onok merenshirtem kidangi anir arung aser iba sülenji khuretji bentetsü ta ashi, saka onoki kechiba parnok anir aotsü" ta Pushpa Kumari-ia ashi.

June 14, 2017 nü Khristantem yimtsüng mendenbuba dangi ao saka pai, "Nenok alii aluttsüla. Yimtsüng nung külemba anentsüla. Khrista sülen manidaksüla aser iba sülen jiang nenok nem tzü agütsütsü" ta ashi.

May 2014 nungi Prime Minister Narendra Modi-i sorkar ketdangtsütsü tenzükba sülen, Hindu nationalist telok- Bharatiya Janata Party (BJP)-i aniba National Democratic Alliance sorkari Hindu nungertem masürtem anema mapa inyaktsü tenzük.

Parnoki sorkar akümba sülen India kübok tesem aika nung Hindu nungertem tali bilemloka oa amangertemi telok tilatem reshikangshir.

ANOGO ABEN TSÜNGREM DEN

TEINYAKER KÜMANG

'Temeli tashi nung tasüba mesüra taküm keta lir; aser shiri ibai meimer pai iba tejang achitsü.' A. Shin 18:21

"Nai kechi memetet iba asoshi na shisatebulu, saka nü taküm nung nai kechi metetet iba amaji na lir asüng malir iba asoshi dang shisabuluang." ta Corrie Ten Boomi ashir.

Yakob 1: 23-25 nung ashir, na teinyaker ka kümang aser nai inyakba nung na moatsütsü. Sayutsüngi aser tajungshiba agütsütsü kanga melar, kaket nung shidak indang aika zülur, saka sayutsüngi agütsüba, ajungshiba aser züluba amaji meliteter aser meinyakteter aji mapa küma inyaktsübajisa tasakba aser iba jagi tangar aika temulung yirua metsüdakdaksür. O ishiba saka inyakba timba südaksüdi.

Asenoki meranga inyakba nung Tsüngrem pelar aser asenok temoatsü, azükaru nung teti alitsü. Temeim adianutem, tamang, tanela jenjang nunga asenok teinyaker akümstüla.

Sarasadem:

Kibuba teinyaker taküm ka alitsü nai ni yangluogo, ni inyakba nung temoatsü liangma. Amen

London Tower lendong sülen arogotemi yariteper



Grenfell Tower nung kitsükkirong lendong nung takoksa ajurutem jenoka aliba Westway Sports Centre nung Queen Elizabeth II (temalen)-i semdangdang agiba noksa angur. Tsünglanglen noksa nung arogo züngsemtemi pei akokba tenla bendendang agiba angur.

London, June 18 (Agencies): chiyungtsütem agütsüba London nung aliba Grenfell den tanurtem kazüdak Tower nung kitsükkirong tesem ka yanglutsü, ta paisa lendong atalokdang metetdaksü. nisungtem kümzüktsü "Osettsüset nungdakba atema mapa inyakba dang masü saka tanüla ketdangsertem nungdaktema agütsür. biletmettsüla ta Christian Sarasadem sentongtem, kati Today nung ocet zülur Andy ka ajurua sensaksemba aser Walton-i ashi. sentong balala ayongzüka takoksa ajururtem yarir" ta

"Asenoki parnok dang pelar ta o agi ashiba dak alia yaritsüla" ta pai ashi.

Bishop of Kensington-ia kibongtem den külemi nung nisungtemi sarasadem sentong nung arogotem dak tenük aden aser parnok süneptsü. Arogotemi temeim aser yoktsüla kechiyong parnok teyari tapu balala agütsür, ta Walton-isa ashi.

St. Clement-i tejenokdak "Kodang lendong ka lapoktsü, Salvation Army- atalokdir, emergency services-i taküm bendanga emergency services nem chiyungtsü aser agüja yarir aser parnok tajemtsütem agütsür, local sülen local arogoi teyari arogotem nungi tenla tapu balala agüja yariteper" agütsür, St. John's, Notting ta Bishop of Kensington-i Hill-i yipden aser ashi.

KBCK youth department-i kenten sentong ayongzüka agi



Dimapur, June 18 (TYO): Konyak Baptist Church Kohima (KBCK) youth department-i Honibarnü "Let the River Run" ta ser kenten sentong ka ayongzüka agi.

Iba sentong ya KBCK nung agi aser IMEA award nominee

James Basnet aser Melodic Voices temi shilem agi.

Melodic Voices nung züngsemtemji Richard, Anguto, Yeshika, Inato, Peteroko, Thungjamo, Vilhou, Akum, Bubu, Maither, Hunali, Thejasanuo, Akhono, Thejano, Tesinle, Roko,

Avise, Jenifer aser Khriela nungertem lir.

KBCK Youth Director-i shilem agirtem ajak dang pelaba metetdaksü aser Tsüngremi moatsüba sempet tajung amshiba atema tenüngsang agütsü.

OLONG PAITEP # 4456

1	2					3			4	
5			6					7		
8					9		10			
			11							
12	13						14		15	
				16						
17							18			
19						20				

TIPIEN

1. Lenden masü - 5
3. Tanüla - 5
5. Tzü meyok - 4
7. O jembiba yimya - 3
8. Inyaktet - 4
10. Ninang ka - 4
11. Mesaklok/memeimer - 5
12. Zükolak tzü - 4
14. Bendenä - 4
17. Alu nung tsük benden - 3
18. Teloktep/Külemi - 4
19. Tzü mali aküm - 5
20. Kechai-a malizüktet - 5

LANGTSÜNGLEN

2. Tenarong majung - 5
3. Sen meyong agütsü - 4
4. Kidang metsüba - 5
6. Tenüngmenük - 5
9. Mesük - 3
10. Mamatzü agütsüba shiruru ka - 5
13. Komo tamaitü - 5
15. Apitet - 5
16. Shiruru aputsü ayuba - 4


OLONG PAITEP # 4455 TELANGZÜBA

TIPIEN :

1. Anatsü, 3. Oshi, 5. Amena, 8. Shin, 9. Temeshi, 10. Asen 11. Jaksü, 12. Aika, 13. Takong.

LANGTSÜNGLEN :

1. Anügdang, 2. Temenen, 4. Senshi, 6. Nehemia, 7. Tenükjang, 8. Shitsük, 9. Tenzük



Lanurtemi Alokba dang onük kar metetnua asügdanger

- Lanur** : Oh! Tashir Alok, shirnok o shirnok na tsükchirar nai kar shiangjong
- Alok** : Itemji yamai, Khristanpur aser temenen na tsükchir, Mi o tzü na tsükchir, telong aser tema sepai na tsükchir. Azü o Napong na tsükchir, An o Shitsük na tsükchir, Nashi o Keyi na tsükchir, mozü o tashitak na tsükchir aser ano Sorak o Ninang na tsükchir adi.
- Lanur** : Nai ano tongtipang ka mashi ado
- Alok** : Nenoki kar shiang ta ashiba agi nia kar dang ashidi
- Lanur** : Süra Nagaland nung NPCC tsükchir shirnok?
- Alok** : NPCC tsükchirji NPF adi
- Lanur** : Ano tanga onük ishika asügdangdi. Shirnok o shirnok na medemer, ishika shiangjong.
- Alok** : Alokba o Sobangba na medemer, Züangi o Menti na medemer, Umrem o Mongmong na medemer, süngo o amsang na medemer, Piga süngo o mochtzü na medemer, mapok chi o lon na medemer, Rum o azü shih na medemer, lozü o tzü na medemer aser ano mejemtsü o akhoni na medemer adi.
- Lanur** : Iba nungia nai kanga dang tongtipang ka mashir ado.
- Alok** : Nenoki ishika shiang ta ashiba agi ni ishika dang ashir. Süra tongtipang kaji asügdanggang.
- Lanur** : Mapok piya medemerji shiba?
- Alok** : Mapok piya medemerbo shinga mali
- Lanur** : Kechiba iba medemerbo shinga mali?
- Alok** : Iba yabo kija dang achiyonga kanga junger, Arogo mapangsertemia iba yabo angudang khenkhen miimshia achir adi.
- Lanur** : Iba ya jembidangbo na kechiba tekong manger, tenüka amur jembir?
- Alok** : Tang tekong aser tenük indang jembir masü, ya tasügdang. Mosa ozüng 10 to tsübuba agi machir dangashi, nia angudangbo khenkhen mapangshia achir adi.
- Lanur** : wha! Alok: Ha!Ha!Ha!
- Alok** : Ho!Ho!Ho!

Lilir : A. Maong Aier, Alongmen Ward.

TANÜBO NAI LANGZÜANG

Q. United Nations Economic and Social Council (ECOSOC) headquarters ya koba yimti nung lir ?

- [A] Paris [B] Geneva [C] Berlin [D] New York

===== (Taruba adok nung onoki langzüsü)

YASHI ADOK TELANGZÜBA : Yeshe Dorjee Thongchi

Tepela Tasoba Anogo



Tanur asoba anogo nung salem osang den noksa angali adokdaksünüra - Tenüng, Küm, School, Talidak & salem osang tejanga züur, noksa (photograph - any size) ka den anogo 3 mesüra 4 jela e-mail : tiryimim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAIA YA METETER MA

INDIA NUNG TANG TASHI GARI REGISTRATION TEIMTIBA ASÜR YIMTI TER YAMAI ALITSÜ :

Rank	India nung yimti tongtipangtem	Gari Registration asürtem
1	Delhi	2172069
2	Bengaluru	800866
3	Chennai	653270
4	Greater Mumbai	617556
5	Hyderabad	558081
6	Pune	332293
7	Chandigarh	286584
8	Ahmedabad	239558
9	Jaipur	235310
10	Kolkata	222069

SUDOKU # 3568

TELANGZÜBA # 3567

9	3	7	6			2	6	3	4	5	1	9	8	7		
						1	8	1	9	2	6	7	5	4	3	
5	8	3	9	1			7	4	5	9	8	3	2	6	1	
3	1		2		5	5	2	4	7	1	6	3	9	8		
8	6		5	3			1	3	7	8	4	9	6	2	5	
	5				8	3	9	8	6	5	3	2	7	1	4	
9	3	5		1	7	6	2	3	7	2	1	9	4	8	5	6
		4				8		6	5	1	3	2	8	4	7	9
			4	5			7	4	9	8	6	7	5	1	3	2

OJANG LUTEP # 4063

- ODATASNG :
- UNNGI :
- ETBAKA :
- ISASHTSÜ :
- ERAS :
- NGMERAH :
- SIRBUH :
- UTENGTBA :
- ISASHTSÜ :
- LABALA :

OJANG LUTEP TELANGZÜBA # 4062

KIBONG NUNG TEBU TAJUNG KAJI AMMANG NUNG MILEN TESANGWA MESÜK

Anü ita petinu ajanga alima nung tsüngsang mopung melenshidaksüba ama nisunger tia-a melenshidaksür ta anü ita petinu tetzürtemi ashir, parnoki ashibaji shidak asü tai'ar nai-a na asoba ita anogo den tanü nü tia medemdang (Horoscope):



Aries
21/3-19/4

Nü tepo calcium agi matu lir, anungji timtem matokdangsa anepalutsüla. Kinüngertem den tesentaktep junga yanglutsü merangang. Nü dak aliba mim ola nungji nai tamang akatsüla.




Taurus
20/4-20/5

Pelaa alitsü mapang ka lir anungji amajok nung shisa mebulutsüla. Nü maparen aika nung nai takok angutsü. Na mapa inyakba tesem nung ajak den yimjung nung alitsü merangang.



Gemini
21/5-20/6

Tesüiba mapangtem amadoker tarutsü nung rangloker mapa inyaktsü merangang. Tanü nai nü mapa nung tangar teyari menüngdaksü. Nü mapa nung temelenshi kar adokdagi.



Cancer
21/6-22/7

Anogo tajungtem arudagi, aser kobi melii nü nükjidong kar ataloktsü. Nai lenmang ajak nung ajemoknüsü saka nai junga shisadangtsüla.



Leo
23/7-22/8

Tangari na junga anepalutsü aser nü dang temeim mapa sayutsü. Nai khen nung mapa ajak meinyaktsüla, ibaji ajanga nai tongtibang mapa junga meinyaktettsü. Telemteba agitsü asoshi anogo tajung ka asütsü.



Virgo
23/8-22/9

Tanü na kanga mazüangi alitsü. Senotsü nung lenmang sadema lapoka lir. Tanep 8:00 nungi 11:00 ako mapangji na asoshi kanga tajung asütsü.



Libra
23/9-22/10

Nü dak aliba shisatsü ajanga na tim lenmang nung anidagi. Iba den külemi nü tia junga alitsü. Tembar tajung den medemtsü merangang. Maparen kar nung tezüngzüktep agitsü asoshi anogo tajung ka asütsü.



Scorpio
23/10-21/11

Lenmang ajak nung na kanga sangra- a alitsüla. Nü dak tashi tasen balaka alitsü. Tanü nai tensa tajung kar ajangshitsü. Nü dak aliba mim ola nungji na tamang katettsü merangang.



Sagittarius
22/11-21/12

Tanü nai ner medemer ka yaritsüa akok. Anisüngzüksü asoshia mapang lateta ayutsüla. Tanü nai nisung ajak den jungtepa litettsü. Senotsü dak sendakba nung tanü nai telemteba kar agitsüa akok.



Capricorn
22/12-19/1

Nü tangatetba tajung ajanga na tim lenmang nung anitsü. Kobi melii na benjung kar nung adentsü. Tanü ajungben nungdak kar adoktsü. Lokti nung nai tongtipang shilem agitettsü.



Aquarius
20/1-18/2

Tanübo nai nü shisatsü süngjemtsüla. Tanü na tera azümesena alitsü saka tongtipang mapatem inyaktsüla. Nikongdang 3:00 nungi 5:00 ako mapangji na asoshi tajung asütsü.



Pisces
19/2-20/3

Nü dak asayamenu aliba sempet jagi nai tangar peladaksütsü. Khen nung mapa aika inyaktsü memerangtsüla. Mapa tasen tenzüksü asoshi anogo tajung ka asütsü iba den külemi nai mapa kar tembanga inyaktettsü.

'The Big Sick' film India nung June 30 nü sayatsü



Mumbai, June 18 (Agencies): Bollywood nung actor tain, Anupam Kher-i shilem agiba American film 'The Big Sick' India nung June 30, 2017 nü sayatsü.

Michael Showalter-i direct asüba film ya Silicon Valley nungi Kumail Nanjiani taküm otsü nung ajemdaker yangluba film lir.

Nanjiani o pa kinüngtsü Emily V. Gordon nati iba film otsü zülu aser Nanjiani-ia film nungji shilem agia lir.

Romantic comedy film ya India nung MVP

Entertainment ajanga sayatsü, ta production company sangdong nung shia lir.

Kasa film nung Shehnaz Treasury, Holly Hunter, Zoe Kazan, Ray Romano, Bo Burnham aser Aidy Bryant nungeria shilem agia lir.

'The Big Sick' film ajanga Pakistan nung asoba comedian Kumail (Nanjiani)-i standup sentong ka nung shilem agiba sülen graduation kaketshir, Emily (Kazan) den sendaktepa akümba otsü ashir.

Tenati aonung ka dang

meimteptsü südi ta bilemer, ajisiüka tena kanga meimtepa akumer, aser Kumail'er tsüraburtemji Muslim yimsü akhanga benschiba tamangertem asübayong timtem aika ajangshir aser par kibong o pa melungjang na tsüngda pa mejeper.

Emily mejangjaba tashidak ka agi yareta (maneni) shirangba ajanga Kumail aser pa tsüraburtem, pai kodanga majurudangba nisungtem- Beth aser Terry (Holly Hunter aser Ray Romano) nunger den külemi la semdangi aoer.

Karate Kid director John G. Avildsen süogo

Los Angeles, June 18 (Agencies): Director John G. Avildsen, shibai Hollywood star Sylvester Stallone adokba film Rocky aser original Karate Kid film asemprongla direct süa liasü, pa arishi küm 81 buba nung süogo.

Avildsen-i 'Rocky' film direct asüba atema Directors Guild of America Award (DGA Award) angu aser ano Best Picture aser Film Editing atema Oscar dena nguogo.

1983 küm pa maneni documentary short film "Traveling Hopefully" atema

Oscar nung nominate süa liasü.

"Onok director John Avildsen asüba osang angashia kanga temolung mepelar. Pai 1976 küm Rocky film direct asüba atema DGA Feature Film Award anguba aser ano tanga mapatem rongnung 'Save the Tiger' aser 'The Karate Kid' franchise nung shilem agibatem metetshii melitet," ta Director's Guild-i sangdong ka ajanga metetdaksü.

Pa taküm aliba mapang DGA's National Board nung term asem tashi inyak; DGA's Eastern Directors Council nung

1977-1990 tashi inyak, Western Directors Council nung 1992-1994 tashi inyak, aser 1987 aser 1996 DGA Negotiating Committees nung züngsem ama inyak.

Avildsen indang tanga film tem rongnung Joe (1970) densema lir. Iba film nung Susan Sarandon aser Peter Boyle nati tongti shilem agi aser iba ya pai direct asüba mezüngbuba film liasü.

Avildsen-i jala Bridget, aser jabasotem Anthony, Jonathan aser Ashley doktsür iba lima nungi pilaa ogo.



Akhidang tajung anogotem menungraa Bollywood actor tejen, Amitabh Bachchan-i Twitter ajanga 1973 küm sayaba film 'Zanjeer' nungi noksa ka lemsatepba noksa nung angur. Iba noksa nungji Amitabh Bachchan-i yamai zülu, "'Zanjeer' nungi noksa ka aser kinüngtsü sangraba bilemteter..... tebur ka melungjang koktettsüji pa tebok ajanga lir. Iba mapang nung ya küna kibong mekümi liasü." Noksa nungji pa kinüngtsü, Jaya Bachchan-i la kinüngbu Amitabh nem chiyungtsü agütsüba noksa nung angur. Atangji iba noksa ya tena aiür-asüngur asüba mapang film nung külemi shilem agidang tangokba noksa ka lir.

TAN HOPTA ATEMA - KOMA SÜLA ?

Q. Nagaland government nung ochimashi inyakba mapatem ajunga ya CBI nem bushisüngdaksütsü asoshi temelaba agütsü nunga koma süla ?

Olong 20 shi nung June 23, 2017 tashi nung iba telangzüba ya onok dangi e-mail - tiryimiyim@gmail.com mesüra SMS - 9856121232 / 9436072422 mesüra Tir Yimiyim Facebook account ajanga yokang. Telangzübatemji taruba Deobarnü adoktsütsü.

Grenfell Tower teyari atema One Direction lungjemtsü



London, June 18 (Agencies): Teburtem kentener telok, One Direction nung züngsem ajunga pei kija ken yanglua atema mapang ka lir, saka iba telok ya mapang talangka melei lungjemtsü ama osang ka aruogo.

London nung aliba Grenfell Tower mi lendong ajurua aliba nūburtem nem teyari agütsütsü mechi iba telok ya lungjema kenten sentong nung shilem agütsü maparen balala inyaktepba mapang lir, ta osang ajanga ashir.

Iba sentong nung shilem agütsü asoshi One Direction züngsem, Liam Payne aser Louis Tomlinson nati molungogo aser iba sentong nung shilem agütsü asoshi Niall Horan aser Harry Styles-na sentong balala yanglua alibatem repringshiba

mapang ka lir. Simon Cowell-i jembiba sülen nungtugu kentener Rita Ora, Robbie Williams, Louisa Johnson, James Arthur, Emeli Sande, Craig David aser 60s mapang kentener nungtugu telok, The Who nung temi iba sentong nung shilem agütsü molungogo.

West London nung aliba Grenfell Tower nung 2017, June 14 anogo mi adoka rongdokba lendong mapang iba ki nung alir nisung 17 asü aser aika chiyongtsü, talidak ki aser abensüoshi agi anünga kümogo. Aser item nisungtem nem teyari agütsütsü atema senotsü bendentsü nükjidong nung kentenertem adenshia ken ka tentsütsü asoshi iba ki anasa alisang, arishi küm 57 tain, Simon Cowell-i kentener aika

den osang agitepba mapang lir. "Iba ken ya Hombarnü tashi nung record süa renemtettsü imlar. Nisung aikati iba ken atenba nung shilem agütsü molunga aliba onok dang shiogo. Iba sentong ajanga temelenshi bener arutsü ni imlar," ta Simon Cowell-i ashi.

Iba lendong nung nisung noklang aika talitsü ki rongdoker alir nem teyari kicha magütsütetra, 'X Factor' nung tetendanger, Simon Cowell, shiba Lauren Silverman den arishi küm asen tain jabaso Eric lir, pa temolung mesangwatsü aser ajem ajema melitetsü, ta ashir.

Iba kenten sentong nung shilem agütsüpurtem ya Simon Cowell indang label, Syco nung alirtem, Little Mix, Camila Cabello, Labrinth aser Noah Cyrus nungertema lir.

GST asoshi Retailer tem renemshidar

Mumbai, June 18 (Agencies): Goods and Services Tax (GST) amenokba ajanga aikati shishilembaba nung kongshitsü ta bilemer saka Organised retailer temi iba tax tasenba ajanga parnok shishilembaba nung kongshitsü meimlar aser iba atema ang renemshir alitsü asoshi inyakdar.

"GST koba July 1 nungi tenzüka mapa küma inyaka aotsüba lir iba atema onok renema alitsü nungdaker. Iba ajanga mapa inyakyim nung liromedema akümtsü," ta Reliance Retail, chief financial officer Ashwin Khasgiwala-i

osangbenertem dang ashi. "Onoki onok yokyatsüya nung iba ajanga kongshitsü meimlar. Shingaia iba dak sendakba nung tebilemtsü kaa lemsatepa mali. Retailer tem atemabo tajanzükji osettsüset yanglurtemi parnok oset jenang melenshidang dang adoktsü koba onoki maneni talirtem nem melenshir agütsütsü," ta paisa ashi.

July nungi tenzüka retail company tulu Reliance Retail, Future Group, Trent HyperCity aser DMart amalai osettem nung jenang kanga ajemtsü imlaa atar.

"Onoki oset jenang shilem 2

nungi 20 tashi ajemer agütsütsü," ta Future Group, chief executive, Kishore Biyani-i ashi.

"GST ajanga shishilembaba nung liromedema akümtsü," ta pai shisemba den külemi parnok atema onük tongtibang kaji customer tem temolung südaksütsüta, ta ashi.

tang tashi nung retailertem aika input tax credit aser e-way bills amala inyakyim nung keno mejangjai angatetnüa lir.

Maneni retail store tem aikati GST mamenok tsüngda parnok osettem talisa electronics amala nung jenang ajemba sangdongogo.

Filmfare Awards South 2017 osang

Hyderabad, June 18 (Agencies): 64buba Filmfare Awards South 2017 sentong Hyderabad nung Deobar nikongdang takok ngua agiogo. Iba sendong nung Tamil, Telugu, Malayalam aser Kannada indang film industry nungi shilem balala nung tushio. Iba Filmfare Awards South 2017 ya Allu Sirish, Ragini Dwivedi aser Vijay Devarakonda nungeri host süa liasü. Iba sentong nung actor Rakul Preet Singh, Samyukta Hegde aser Nikki Galrani nungertemi shilem balala agi. Iba sentong nung R Madhavan, Suriya, A R Rahman, Trisha aser Nivin Paul nunger tema arua aden.

Filmfare Awards South 2017 takok angurtem yamai alitsü:

Best Film: **Maheshinte Prathikara** (Malayalam)

Best Film: **Thithi** (Kannada)

Best Film: **Joker** (Tamil)

Best Film: **Pelli Choopulu** (Telugu)

Best Actor (Male): **Junior NTR** (Nannaku Prematho, Telugu)

Best Actor (Female): **Samantha Ruth Prabhu** (A Aa, Telugu)

Best Director: **Vamsi Paidipally** (Oopiri, Telugu)

Best Director: **Rishab Shetty** (Kirik Party, Kannada)

Best Director: **Sudha K Prasad** (Irudhi Suttru, Tamil)

Lifetime Achievement Award: **Vijaya Nirmala**

Filmfare Critics Award for Best Actor (Male): **Allu Arjun** (Sarrainodu), **Dulquer Salmaan** (Kali & Kammattipadam), **Rakshit Shetty** (Kirik Party) aser **Suriya** (24)

Filmfare Critics Award for Best Actor (Female): **Ritu Varma** (Pelli Choopulu), **Shruthi Hariharan** (Godhi Banna Sadharana Maikattu) aser **Trisha** (Kodi)

Best Actor in a Supporting Role (Male): **Jagapathi Babu**


Best Actor in a Supporting Role (Female): **Nandita Swetha**

Best Playback Singer (Male): **Karthik**

Best Playback Singer (Female): **KS Chithra**

Best Music Album: **Devi Sri Prasad** (Nannaku Prematho)

Honor 8 Pro India nung taruba ita sayatsü



June 18, 2017 (Agencies): Camera nung 'optical lenses', Smartphone camera 'sensors', 'image processing technology jenang temaba kati ajungketa Chinese smartphone company Huawei kübok nungtugu 'Honor brand'-i India nung "Honor 8 Pro" sayatsüba keta lir.

"Honor 8 pro" smarhphone ya July ita tetenzüklen sayatsü renema lir aser jenang 37,000 shi asütsü imlar.

"Honor 8 Pro" nung 12MP duel-lens camera keta aliba ajanga tamshirtemi noksa quality tajung tangoktettsü.

Camera nung 'optical lenses', 'sensors', 'image processing algorithms' tem keta lir koba ajanga DSLR camera tem mesüka noksa aser video nung effects agütsür.

"Honor 8 Pro" nung 4th generation camera setup ajanga onok küm aika dual-camera setup nung inyaka aruba tajungtiba sayatsü aser iba ajanga India nung iba phone amshirtemi noksatem tajung tangoktetba repringtettsü," ta, Huawei India Consumer Business Group nung Director, Product Centre, Allen Wang-i osangbenertem dang ashi.

SS Thaman-i Bigg Boss Telugu music mejemtsü

Chennai, June 18 (Agencies): Nungtugu southern composer S.S Thaman reality show Bigg Boss Telugu atema music mejemtsü asoshi aniokogo. Pai ashiba agi, music tem ajanga audiences tem jangratemdaktsütsü.

"NTR indang Bigg Boss atema music yanglu tang ang temogo. Music tem ajanga nenok kanga jangratemdaktsütsü," ta Thaman-i Hokolbar aonung tweed asü.

Junior NTR-i iba show Telugu version host asütsü aser

iba ya Star Maa nung sayatsü. "Ni iba maongka ngutetba atema kanga pelar. NTR indang film nung mapa inyaktsü ya jangratemtsüka lir," ta paisa osangbenertem dang ashi.

Taoba mapang nung Thaman aser junior NTR na Brindavanam, Baadshah aser Rabhasa film tem nung külemi longjemer inyaka liasü.

Naayak composer ya maneni Bollywood nung mezüngbuba Rohit Shetty indang 'Golmaal Again' film nung shilem agütsü asoshi yongyaa atadar.



Le Bourget, June 18 : AeroMobil indang flying car ka 52buba Paris Air Show, Paris anasa Le Bourget Airport nung metenzük tsüngda tangokba noksa nung angur. Iba tayimtsü yagi 3048m tashi azükleni yima tuteter aser km 700 yimteter.



New Delhi, June 18, 2017: Deobarnü New Delhi nung Finance, Corporate Affairs & Defence Union Minister, Arun Jaitley mendenbuba ser 17buba GST Council senden amenba noksa nung angur. Kasa noksa nungsa Minister of State for Finance, Santosh Kumar Gangwar, Revenue Secretary, Dr. Hasmukh Adhia aser Chief Economic Adviser, Dr. Arvind Subramanian nungera angur.

Yimtsüngtem nung health service tajungba agütsütsüla: Tir Pranab

New Delhi, June 18 (Agencies): Deobarnü Tir, Pranab Mukherjee-i, nisung ajak nem anema alibaren service tajung agütsütsü nungdak, iba den külemi yimtsüngtem nung doctor temi yimdaklirtem tenzüktetsüsa infrastructure tajung agütsütsüla, ta ashi.

New Delhi nung Shambhu Shetty Memorial Haji Abdullah Super Speciality Hospital amenoktsü atema lung azüngsüba sentong nung jembidang Pranab-i, health service tajung angubaji joko takar ama aliba libaliro ka masü

saka nungdakba ka lir, ta ashi. Pranab-i ashiba agi, International telatet nung nütsüng 1000 shia doctor kakabosa alitsüla, ajisüaka India nungbo nütsüng 1,700 shia doctor kaka dang lir.

"India yimtsüngtem kübok community health centre tem nung surgeons shilem 83.4 agi anünger, obstetricians aser gynaecologists shilem 76.3 agi anünger, paediatrics shilem 82.1 agi anünger aser general doctor shilem 83 agi anünger," ta Mukherjee-i ashi.

"Iba ya ajanga, asenoki doctor shilem 50 agi ajemer

tesayuba aser training agütsüba jangjar," ta paisa metetdaksü.

Pai ashiba agi, doctor tem agi anüngba atema tangsa rondak süa inyaksüla aser tashidaktem nokdangba nung rangloker inyaksü nungdak.

District aser yimtsüngtem nung infrastructure tajung agütsütsüla, koba ajanga item tesem nung inyaksü asoshi doctor tem ajungmesotsü, ta paisa ashi.

"Tesüiba küm 70 nung asenoki healthcare tsütsü kanga terenlok nguogo," ta paisa shisem.

June 23 matongdang BJP-i Tir candidate sangdongtsü

New Delhi, June 18 (Agencies): Deobarnü Bharatiya Janata Party (BJP) lenir aser Union Minister, M. Venkaiah Naidu-i, June 23, 2017 nü tashi nungbo party-i linük Tir candidate tenüng sangdongtsü, ta metetdaksü.

Tanep Naidu-i phone ajanga Union Food Minister, Ram Vilas Paswan den Tir election atema o lemtepa liasü.

Naidu-i, "Iba telemteba yakta agitsü aser June 23 nü tashi nungbo Tir candidate tenüng sangdongtsü," ta metetdaksü.

Paisa, "Paswan temang anepalutsü atema London-i ogo, aser pa arutsü atema onoki atatepdar. Tir election dak sendakba osang ajak ni pa nem metetdaksüogo. Ato kilonser, Modi-i kechi lemtetdir ibaji ajaki agizütsü ta pai shiogo," ta ashi.

Iba sülen pai Union Home Minister, Rajnath Singh-a ajurua liasü.

Hokolbarnü Rajnath aser Naidu nati Communist Party of

India (CPI) lenirtem- D. Raja aser Sudhakar Reddy na ajurua Tir election atema jembia liasü. Ano külen tanaga osang ka nung, tanü BJP Tir, Amit Shah-i Shiv Sena tongti lenir, Uddhav Thackeray ajurua Tir election atema jembi.

Shiv Sena osang ka ajanga ashiba agi, Shah-i Thackeray dang, Ato kilonser, Narendra Modi-i NDA nungi Tir candidate shimtsü ta metetdaksü.

Ibaji langzüka Thackeray-i, BJP-i tenüng sangdongba sülen ang Shiv Sena-i candidate ji nungittsü asü menungittsüar telemteba agitsü ta shiogo, ta kasa osang ajanga shisem.

Taoba mapang Tir election ana nungbo Shiv Sena-i Congress Party-i shimba candidates- Pratibha Patil aser Pranab Mukherjee pusema liasü.

Taruba Tir election July 17, 2017 nü agitsü aser tang teinyakdak Tir, Pranab Mukherjee July 25 nü Tir menden nungi anisüngzütsü.

Karnataka nung tenük-telen tenlatsü atema Aadhaar nungdaksü

Bengaluru, June 18 (Agencies): Karnataka sorkari, temang shilem, tenüktelen tenlatsü atema nangzükerem indang Aadhaar nungdaksü, koba ajanga ketdangsertemi tenüktelen tenlartem tenüng züluoka yur tenlartem kinüngertemi ashishidang kuli agütsütetsü, ta metetdaksü.

Iba ozüng tasenba ajanga tenüktelen tenlatsü atema mapang kümzütsü aser nisung aika kümzüktetsü, ta state Health Ministry Principal Secretary, Shalini Rajneesh-i metetdaksü.

Iba ozüng ajangasa, asür kati tenüktelen tenlatsü atema nangzüker asü menangzüker ibaji melamela jangjatsü, ta Shalina-isa ashi.

Rajneesh-i ashiba agi, nisung aikati parnok sür sülen tenüktelen tenlatsü atema nangzükbaji par kinüngertem nem memetdaksür, ajisüaka Aadhaar nung biometric osangtem ajanga ibaji melamela inyaktetsü.

Osang ajanga angazükba agi, Deobarnü Guinness record yanglutsü atema nisung 1,500-i yoga aidang iba atema mapatong ka tenzüka parnoki Aadhaar osangtem agütsüogo.

Parnokisa World record ka yanglutsü atema temang tenüktelen tenlatsü asoshi tenangzüka agiogo.

Hokolbarnü Union sorkaria bank account tasen lapoktsü aser sen 50,000 dak tema transaction atema Aadhaar

nungdaksü, ta metetdaksü.

Ano tamalen bank account lapoka alirtem danga taküm December 31 nü tashi nungbo bank tem nem Unique Identification Authority of India (UIDAI)-i agütsüba Aadhaar number agüjang ta metetdaksüogo. Iba anogo tashi nung Aadhaar number magütsürtem indang bank account ji magila akümtsü ta sorkarisa metetdaksü.

Sorkar nem saru magütsütsü nükjidong nung nisungtemi PAN card ka dak tali amshiba nokdangtsü atema sorkari General Budget 2017 nung Aadhaar number den Permanent Account Number (PAN) sendakteptsü atema benoka liasü.



Srinagar nung tensa süngjemba sülen June 18 nü yimti nung aliba 'Sunday Market' lapoka nüburtem shishiba noksa nung angur.

Centre-i sorkar mapa inyaker 67,000 mapa asadangtsü

New Delhi, June 18 (Agencies): Centre sorkari IAS aser IPS ketdangser densema sorkar mapa inyaker 67,000 indang service records asadanga reprangtsü tenzüko.

Nüburtem tenzüko mapa tajungba akümtsü aser yimsüsüba jenjang tajungba akümtsü nükjidong nung Centre-i iba telemteba agi.

Department of Personnel and Training (DoPT) nung tongti ketdangser kati, iba maparen tembangba sülen mapa junga meinyakertem nembo temerenshi agüja tembangtsü, ta ashi.

"Mapa junga meinyakertem jangjatsü atema Centre sorkar mapa inyaker nisung 67,000 indang service records reprangtsü," ta paisa ashi.

Parnok rongnungi nisung 25,000 shibo Indian Administrative Service (IAS), Indian Police Service (IPS) aser Indian Revenue Service (IRS)

densema Group A services nungi lir, ta ketdangserisa ashi.

Osangbeneri Minister of State for Personnel Jitendra Singh den jembidang minister-i, iba maparen ya, külen mapa junga inyaksü, aser ano külen ochimashi nokdangtsü atema lir, ta ashi.

Singh-isa, NDA sorkari tesüiba küm asem yimsüsüba mapang nung transfer policy, Leave Travel Concession ama nung ozüng aika melenshiogo, ta ashi.

Tesüiba küm ka kija nunga Centre sorkari IAS aser IPS ketdangsertem densema mapa junga meinyaker nisung 129 mapa nungi anentsüogo.

Sorkar inyakyim nungbo, sorkar mapa inyaker ka mapaji anaben dang reprangshir. Sorkar mapai aiba sülen küm 15 nung khen aser küm 25 sülen khen reprangshir.

Tang linük nung Centre sorkar mapa inyaker nisung 48.85 lir.



New Delhi, June 18, 2017: International Yoga Day atongtsü anogo ishika dang lia Deobarnü New Delhi nung Minister of State for Finance, Arjun Ram Meghwal-i yoga aiba noksa nung angur.

Portugal morok mi nung nisung 62 asü



Coimbra, June 18 : Central Portugal nung aliba Pedrogao Grande anasa 2017, June 18 nung morok mi adokba lendong nung gari ka rongdoker aliba noksa nung angur.

Coimbra, June 18

(Agencies): Portugal nung morok mi lendong adokba ajanga tanur pezü densema nisung 62 taküm sama, ta sorkar ketdangser ajanga ashi.

Coimbra nungi south-east tsütsü kilometre 50 orr aliba, Pedrogao Grande tesem nungi ajentsü merangba mapang asür timba liasü, ta Portugal sorkar ajanga ashi.

Iba morok mi anendaktsütsü asoshi firefighter aika tesem balala nung mapa balala inyakba mapang lir.

Morok mi lendong rongnung ibai tulutiba asütsü, ta Portugal Ato Kelonser, Antonio Costa-i sangdong.

Iba lendong nung nisung asür ya anu alitsü südi, keciyong nisung aika mangu bushitepba mapang lir, ta pai shisem. Deobarnü nungi tenzuka anogo asem linü mangyim alitsü sorkar

ketdangser temi sangdongogo.

Iba lendong nung asür nisung timbaka mokozü saokba aser mi agi arungba ajanga lir aser nisung ana iba lendong den sendaktepa lenmang nung accident süa asü, ta Secretary of State for the Interior, Jorge Gomes-i ashi.

Gari telung nung nisung tasü mang 30 ngutet, tasü mang 17 gari anasa angu aser tasü mang ka IC8 motorway nung ngutet, ta pai-sa ashi.

Iba lenmang anasa aliba yimtsüng ka nung nisung 11 tasü mang ngutet.

Firefighter noklang aika den gari 300 tashi iba morok mi remseptsü merangba mapang ka lir, saka iba mi kanga tulu asüba ajanga kanga mela bo iba morok mi meremseptetsü, ta Portugal nung aliba osangbener temi ashi.

Iba mi lendong nung arishi

küm 8 tain tetsür ka densema yiru aser la ya mi anasa arem nung nemzua senzua aliba ngutet, ta kasa osang ajanga ashi.

Iba mi lendong nung firefighter trok kanga mejungi yiru aser ana samar aliba, yirur lia ngutet, ta sorkar osang ka ajanga ashi.

Tesem aika nung ketdangser temi osang magiteter, aser item tesemtem nung asür alitsü südi, ta kasa osang ajanga ashi.

Portugal nung morok mi tesem 60-shi nungi tenzük aser iba mi remseptsü asoshi firefighter 1,700 jungnüa oa lir.

Iba morok mi remseptsü asoshi Spain nungi 'water-bombing' tayimtsü ana yok aser European Union ajanga international firefighter aser teyari balala agütsütsü asoshi osang agitepba mapang ka lir.

Iba mi lendong adokdaksüba kuli tejanga memetet, saka tsüngi ajanga adokdaksü südi, ta Ato Kelonser-i ashi.

Portugal nung tesem kar nung kanga tatsük lir aser temperature 40°C (104F) tashi lir.

Taoba küm 20 tejaklen iba ama morok mi lendong adoka liasü, saka tang adokba ya tesashiba lir, ta sorkar ketdangser temi ashir.

Iba morok mi adokba tesem ya arem min lir aser kanga takong lir. Iba ama tsüngsarosa nung tsüngi ajanga mi adokdaksütsü lenmang sadema lir, ta ketdangser ajanga-sa ashir.

Saada shishilembadak nisung 25 tepset

Shada, June 18 (Agencies): Saudi Arabia-i aniba teloki tayimtsü amshia northern Saada province nung shishilembadak tesem ka amakba mapang Yemen nunger civilian 25 tepset, ta iba tesem nung aliba ketdangser ajanga ashi.

Saudi arrtsü anasa aliba Shada district nung al-Mashnaq shishilembadak tesem nung tayimtsü ajanga Deobarnü anaben amak, ta Saada nung Houthi indang health department office Director-i ashi.

"Iba lendong adalokba sülen anu prangbong tulu amshia amaktsü tsübuba ajanga mapang talangka iba tesem-i ketdangser tem oa meyaritet," ta Dr Abdelilah al-Azzi-i telephone ajanga osangbener dang Deobarnü ashi.

Saada nung iba lendong adalokba ya Yemen nung aliba osangbener temia metetdaksüogo.

Saka iba osang asoshi Saudi-i aniba telok ketdangsertem den anu mejembiteti lir.

Saudi-i aniba coalition ajanga iba sensaker linük nung Houthi telungpur anema tayimtsü

amshia küm ana dak tali rara-arur.

Iba linük nung rara agi sünger lir aser linük nungi meindoker aliba sorkar nung tir, Abd-Rabbu Mansour Hadi ya Saudi-i aniba mitkar temi yaria iba linük nung tanaben yimsü asütsü asoshi Iraq den tesendaktep aliba, Houthi telok den rara-arudagi. Northern Yemen ajanga aser Yemen yimtiba, Sanaa ya iba Houthi telok ajanga amokbanga lir.

Saudi-i aniba teloki Yemen anülulen Temerem Tzüyim (Red Sea) anasa aliba Khoukha jila nung tayimtsü amshia March ita amakdang nisung 22 tepset aser aika yirua liasü.

Yemen nung raraba mapang nisung 10,000 dak tali taküm samaogo aser nisung million asem dak tali tesem balala-i prokshio.

Houthis aser taoba Yemen tir, Ali Abdullah Saleh busemer den raratsü asoshi Saudi-i aniba telok ya 2015 küm tenteta liasü.

Yemen indang province 22 nungi tesadang ka nung ayawara arutsü ana nung lir, ta UN World Food Programme ajanga March ita sangdonga lir.



Beijing, June 18 : China yimtiba, Beijing nung aliba Diaoyutai State Guesthouse nung Chinese Foreign Minister, Wang Yi (achichi)-i India nunger Minister of External Affairs, Vijay Kumar Singh 2017, June 18 nü ajuruba mapang tangokba noksa nung angur.

Taliban teloki Afghan police pongu khaset

Kabul, June 18 (Agencies): Afghanistan anüdoklen aliba Gardez yimti nung police headquarter kati Taliban telungpurtem ia amakba mapang police tanishir pongu asü, ta Afghan interior ministry osang ajanga ashi.

Deobarnü iba kasa lendong nung police tanishir 9 aser civilian 13 yiru, ta Paktia province police tekolakba indang odongtar, Sardar Wali Tabasim-i osangbener dang ashi.

Iba police headquarter nung Afghanistan eastern province

indang regional command indang ki lir, aser Taliban telungpur 7-i iba lendong agütsü aser item telungpur ajanga iba headquarter nungsa khaset, ta Tabasim-i metetdaksü.

Iba lendong ya Taliban teloki agütsü, ta Taliban odongtar, Zabihullah Mujahid-i sangdong ka nung ashi.

"Item telungpur temi mezüng police headquarter indang gate tuluba nung gari bomb ka pokdaksü aser iba lenmang ajanga telungpurtem ia police dak amak," ta osangbener kati ashi.

Muslim nunger temeshi ita, Ramadan tenzük Taliban teloki Afghanistan nung mitkar aser police aliba tesemtem nung lendong tesashi agüja arutagi, aser bendanger mitkar temi Afghan mitkar yarirtem densema item teloki amaker.

Taoba Honibarnü iba ama lendong ka adalok aser iba lendong nung US mitkar 7 yirua liasü.

Kandahar province nung mitkartem aliba tesem ka Taliban teloki May ita amakdang Afghan mitkar 15 asü.



Paktia, June 18 : Afghanistan nung aliba Pakita province nung 2017, June 18-nü suicide bomb ka apokba sülen Afghan mitkar temi gari ka mita reprangba mapang tangokba noksa nung angur.

Cairo bomb lendong nung police ka pokset

Cairo, June 18 (Agencies): Egypt yimtiba, Cairo tezülen aliba Maadi tesem nung lenmang anasa bomb ka apokba lendong nung Egypt police ka asü aser pezü yiru, ta sorkar sangdong ka nung ashi.

"June 18 anepdang 12:45 meta Central Security Forces indang gari ka nung police tanishir kar mener aoba mapang lenmang nung yuja aliba bomb apok," ta Interior Ministry ajanga Deobarnü sangdong.

"Iba lendong nung First Lieutenant, Ali Abdelkhalig asü aser oplice tanishir pezü yiru. Item yirur alirtem ya mozüki nung anepaluba mapang lir," ta kasa osang ajanga ashi.

Iba bomb ya tesem balaka nungi inyaksangshia pokdaksü aser mezüng bushisüngdangba mapang iba bomb ya mobile phone indang SIM card amshia pokdaksüba amai bushitet," ta Interior Ministry nung ketdangser kati ashi.

Iba lendong adalokba tesem nung aliba ki nung alirtem dang asüngdangya südagi aser iba lendong agütsür putettsü meranger, ta kasa osang ajanga-sa ashi.

Iba lendong agütsüba tenüng ya telok katia agia mali.

2013 küm nungi tenzuka Egypt indang Sinai Peninsula nung Islamic State of Iraq & Levant (ISIL) ajanga lendong balala agüja arudagi aser iba mapang mitkar aser police noklang aika taküm samaogo.

ISIL koba dang ISIS ta ajar, item telok ajanga mitkartem aser Coptic Christian nüburtem dak amakba lendong aika ajuruogo aser December nungi tang tashi nung Coptic Christian 100-shi tepsetogo.

Item telok kisüng masü saka Cairo nung telungpur telok aika lir aser item telok ajanga mitkar, obendanger aser sorkar busemer tem dak tenük yoker lendong agüja arur.

Modi sorkari nashi tepsetba nokdangtsü: Swamy



Mumbai, June 18 (Agencies): Deobarnü BJP lenir, Subramanian Swamy-i, linük tesem ajunga nung nashi tepsetba nokdangtsü atema Modi-i aniba sorkari ozüing ka benoktsü, ta metetdaksü.

'Bos Indicus: The Glorious Indian Cow' ta ser Virat Hindustan Sangam (VHS)-i ayongzükba senden nung jembidang Swamy-i, "Tangbo ozüing tejangja ka mali, ajisüaka ano onoki yimsüsütsü küm ana anünga lir. Iba sülen ano küm pongu yimsü asütsü akok,

anungji linük nung nashi tepsetba ozüing ka latettsü," ta ashi.

VHS ya Swamy-i tentetba telok lir.

"Kuli aika atema asenoki nashi kümzüka ayutsüla," ta paisa ashi.

Iba senden ya Bombay Stock Exchange (BSE) aser Iscon nati senteper ayongzükba liasü.

Swamy-isa, nashi kümzüksü aser Gaushalas yanglutsü atema senotsü peria agütsütsü, ta ashi.

"Asenoki nashi kümzükertem jenjang ajungkettsütsüla aser parnok

nem certificate agütsütsüla, koba ajanga shingaia parnok menokdangtsü aser lenmang nung tepsettsü. Rara tatalokbatem ajak tu ozüing alema benshirtemi lir. Gaurakhshaks-i mapa tajung inyakdar aser gau-rakshaks tasen tentettsü," ta pai ashi.

"Supreme Court-i, nashishi achitsüji Islam yimsü shilem ka masü ta aiben shiogo. Nashi shi achiba nokdangtsü ozüing latettsü atema ozüing kechaia asenok menokdangtetsü," ta paisa ashi.

Rajya Sabha züingsem, Swamy-isa, taoba Congress sorkari subsidy balala ajanga nashishi bendangleni yokba nungita liasü, ta aitsü.

"Nashishi bendangleni yoktsü atema Congress sorkari subsidy tapu 13 agüja liasü, ajisüaka ozü sorkar aruba sülen itemji ka ken ka khen ta anentsü, aser ibaji ajanga nashishi tangaleni yokba jenjang ajema alu," ta pai ashi.

Kerala nung wara balala agi taküm nisung 103 süogo

Thiruvananthapuram, June 18 (Agencies): Taküm küm tenzüker Kerala nung wara balala agi nisung noklang ka dak tema asüba sülen tanü state sorkari nüburtem dang sorkar indang merükmejuba mapatong nung shilem agitsü ayongzükogo.

Health Department osang ajanga ashiba agi, taküm January ita nungi tenzüka tang tashi nung state nung H1N1, leptospirosis aser dengue densema wara balala agi tanur aser tetsür densema nisung 103 süogo.

Tasürtem rongnung nisung 53 H1N1 agi aser dengue agi

nisung 13 asü.

Wara aser menatepba tashidak prokbaji talisa, jana bendena ayuba ajanga merla aika poktetba agi lir, anungji tashidak balala nokdangtsü atema merükmejua alitsüla, ta Chief Minister, Pinarayi Vijayan-i ashi.

Sangdong ka ajanga Vijayan-i, "Yimtenren party nung inyakerem, lokti tenzükertem aser club balala nungi züingsemtemi merükmejuba mapatong nung shilem agitsüla," ta ashi.

Merükmejuba mapatong nung shilem agiba tesemtem

nungbo wara balala ajema kümogo, ta paisa metetdaksü.

Paisa ashiba agi, sorkar hospital ajak nung nüngdakba mozütem aser doctor peria alitsü atema sorkari tetuyuba agütsüogo.

Ano külen Opposition lenir, Ramesh Chennithala-i tanü Vijayan ajurua iba tebilemstü koktetsü atema tezüluba nung onük kar agütsüogo.

Chennithala-isa, health department-i item wara nokdangtsü nung tamakok nguogo aser state Health Minister K K Shylaja-i iba atema kecha meinyaker, ta aitsüogo.

Rajasthan nung aluyimertemi June 20 nungi longkak aittsü

Udaipur, June 18 (Agencies): Rajasthan sorkari state nung aluyimertem atema meinyakba nung ajemdaker Deobarnü aluyimertem tentet, Bhartiya Kisan Sangh (BKS)-i, parnoki state sorkar anema June 20, 2017 nungi state tesem ajaklen longkak aittsü, iba den külemi state nung aluyimertem market (mandi) shibangtsü, ta metetdaksü.

Osangbener den jembidang

BKS state general secretary, Kailash Gandolia-i, parnoki akhangbatem meinyaktsüba anema parnoki Vasundhara Raje Scindia-i aniba sorkar anema longkak sashia aittsü, ta metetdaksü.

"Iba sorkar ya temulung teküprak. Onok tebilemstü onüktem atema parnoki tejembia mejembir. Yimtsüing ajak nung aluyimertem market shibangtsü aser lenmang nung

longkak aittsü. Iba maparenji June 20 nungi tenzüksü," ta Gandolia-i ashi.

Paisa, mepetmesü kar danga atalokra iba longkakji tesashiba aittsü, ta amokmeren.

Osang angazükba agi, sorkari Minimum Support Price (MSP) agi mustard alitsü memelungba ajanga parnoki longkak aittsü lemtet.

Iba dak alia aluyimertemisa loan atoktsü atema akhanger.

Uddhav Thackeray-i Amit Shah o magizük

Mumbai, June 18 (Agencies): Shiv Sena tanishir Uddhav Thackeray-i Bharatiya Janata Party (BJP) tir Amit Shah dang tamasa presidential candidate indang tenüing yimjak nung metetdaksü atema ashi ta osang angazüker.

Deobarnü Thackeray aser Shah na ajurutepa senden amendang Thackeray-i presidential candidate tenüing metetdaksüba sülen ang BJP den yaritepba teloktem dang nungi teyari meshiang ta ashi.

Prime Minister Narendra Modi-i tir menden atema NDA candidate shimtsü ta Shah-i ashi. Idangji Sena tanishisangi tir indang nübo metetdaksüba sülen ang parnok tebilemba metetdaksütsü ta ashi, ta Shiv Sena osang ka ajanga metetdaksü.

Tanep Maharashtra Chief Minister Devendra Fadnavis-i Shah meiner Thackeray'er 'Matoshree' kidangi ao aser

ghonda ka ser tesadang ka shi senden amen.

BJP tir Shah-i Maharashtra nung anogo asemnü amungtsü atema arua lir. Maharashtra nung BJP akangshitsü atema pa aru aser pai ashiba agi, NDA indang presidential candidate meshidang, tamasa parnok den yaritepba teloktem den asüingdangyatsü.

Shiv Sena ya BJP den yaritepa arur telok rongnung tejenba lir aser taoba mapang parnoki tir menden atema "independent" lenmang shimtsü akok ta metetdakja lir.

Tesüiba presidential elections ana nung parnoki Congress nübotem- Pratibha Patil aser Pranab Mukherjee na pusema nungit.

Shiv Sena-i BJP aser Modi'er sorkar anema onüktem jembia arur aser tawa tu parnoki Tir atema MS Swaminathan (father of India's Green Revolution) shim nung junger ta metetdaksüogo.

AO TEMULUNG CHAMPIONSHIP

Under Mokokchung District Table Tennis Tournament

Organized by :

Pongen Khel Sports Association Mopungchuket

Date : 3rd - 4th July 2017

Venue : Mopungchuket Community Hall

Total Cash Prize: ` 50,000/- only

Forms Available at:

1. Students Books Stall (near police point)
2. Walok Enterprise (near MTBA Church)
3. Students Book Centre (I.M. Road)

Last date for form submission 30th June 2017

Mob: +919436655009 / +919856099114

Oba! Mapangi yaang Senpettsüji

Lanu Atsongchanger, 2017

Anogotem süitema aodang,
Ozütemi ken atenbato anena akümer.
Ya koda asü, anü-a shimaka akümer,
Itaia tesangwa agütsütsü memelonger.

Anüing repringketa yok nung,
Oh! Iba na iba akümlü lima mali
Petinutema shimaka angur.
Temulung rongjenseta anogotem süidaksür.

Na akümlü alidang ni kanga aküm keta liasü,
Na akümlü alidang ni kodanga merongjen,
Na akümlü alidang ni ani süngzükdak na liasü
Saka tanü na mali ni kanga rongjenseter.

Kidang atep nung ojalai anir chiyongteper,
Saka nü ausobo magizük itak-a angudang
Onok ajak ola madok tenük nung nüktzü aneter.
Aya Oba! Mapangi yaang senpettsüji.

Kibong tekülem agidi asüidang
Kinunger ajak pei menden nung menseper
Saka nü menden tazüing angudang.
Oba, Yamai tiatsü no! ta temulung ayanger.

Anü adoka anepdang akümdang
Kima nü menden tazünger angur,
Ashi, na mena ali asübo ta,
Nünem süngo bener arua agütsüba bilemteter.

Kima yimdong nung nü medemertem ajurudang,
"Küdi



Hyderabad nung aliba Global hospital nung ita ka tsüingda Heart Transplantations pezü tashi takok ngua agitetba atema osangbener senden ka ayongzükba agidang Dr. K Ravindra, Chairman Gleneagles Global Hospitals, Dr. Saisudhakar, chief cardiac Transplant physician, A Naresch Chief Cardiac Transplant Surgeon, Dr. Rajeev Garg aser teyari angurtem külemi agiba noksa ka angur. (Hyderabad, June 18)

2017 ICC Champions Trophy Pakistan-i akok



London, June 18 (Agencies): 2016 ICC Champions Trophy marok bena aliba telok, India aser Pakistan tsüngda The Oval nung 2017 Champions Trophy indang final Deobarnü asayaba nung Pakistan-i runs 180 agi India madak takok angu. Iba cricket asaya nung Pakistan teloki mezüing batting asüba nung wicket pezü out süa runs 338 yanglutet aser India teloki iba runs meneptsü arishiaka par

telok over 31 nung runs 158 dang nguteta lia ajunga out sütsü. Pakistan telok nungi Mohammed Amir-i kanga junga ball aonba ajanga India telok nungi batting asür tajungtem, Rohit Sharma (0), Virat Kohli (5) aser Shikhar Dhawan (21) out sütsütet. India telok nungi Hardik Pandya-i tajungba asayatet aser pai runs 76 yanglutet saka India telok ya runs 158 dang lia over 30.3 nung ajunga out sütsü.

Pakistan telok nungi opener, Fakhar Zaman ya Jasprit Bumrah-i over pezüububa nung out sütsütsüa liasü saka ibaji 'no-ball' asüba ajanga out masü aser pai runs 114 yanglutet. Pakistan telok nungi Azhar Ali-i runs 59, Mohammed Hafeez-i runs 57 aser Babar Azam-ia runs 46 yanglu. Iba asayatsü asoshi toss asayaba nung India-i akok aser Virat Kohli-i mezüing bowling asütsü shimteta liasü.

Nüburtemi ni McGregor den tsüngtepdaktsüner: Floyd

Los Angeles, June 18 (Agencies): Nüngtugu boxing asayar Floyd Mayweather-i ashiba agi, pa boxing asayaba nung anener liaka tanaben asaya nung shilem agia mixed martial arts asayar Conor McGregor den tsüngteptsü asoshi kecha tebilemstü mali. Iba asaya ya karibo boxing asayaba otsü nung sen timtiba aaba asaya ka asütsü ta takzur. "McGregor ya tetokteper tajangka lir. Alima ajunga nungi nüburtemi iba asaya akhanger anungji parnok nem reprangdaktsütsü," ta Mayweather-i Honibarnü osangbenertem dang ashi. Bodhbarnü tena asayatsüba

osang sangdongba sülen iba ya yimjak nung Mayweather-i mezüingbuba jembiba asütsü. Iba asaya ya August 26 nü US boxing capital Las Vegas nung asayatsü. Arishi küm 40 tain Mayweather 2015 küm September ita Andre Berto akokba sülen boxing asayaba nungi anenadok. Pa boxing asayaa aruba nung 49 ben asayaba nung khen danga tamakok ngua mali aser tang McGregor den asayatsü aliba ajanga pa nem asaya 50ben buba akoktsü asoshi maongka bener arutsüogo. Iba asaya nung senotsü dak sendakba nung asüngdang dang Mayweather-i lokti anaprongla

temolung süogo ta langzü. "Telok anaprongla kanga pelar. Pa kanga pelar, nia kanga pelar aser asayatsü asoshi matateter," ta Mayweather-i ashi. Ajisüaka boxing nung mongintemi iba asaya exhibition asaya ka amai dang lir ta shia aitsüogo. Parnoki ashiba agi, arishi küm 28 tain McGregor-i professional boxing asaya ka danga tang tashi nung asayaa mali. Tena tsüngteptsüba sangdongba sülen tang tashi nung khen danga ajurutepe mali saka tena promotional tour aotsü atema yakda sangdongtsü imlar aser iba sentong nung US nung yimti tongtibang ka ana semdangtsü südi.

Kalimpong nung GJM-i tasü mang ... (Tapak 1 nungi)


"Iba onük den sendaktepa aliba party aser teloktemi olemtep ajanga mangatettep alibatem angatetteptsüla" ta Rajnath-i ashi. Home Minister-isa ashiba agi, India ama democracy ka nung, ozüing alema inyakba ajanga telemtetba mongutettsü. West Bengal chief minister Mamata Banerjee-i Rajnath den phone ajanga tensa indang osang tejangja metetdaktsüba sülen pai iba temepishiba ayimoktsü. "Olemtepakaba ajanga onükajak angatetteptsü akok. Iba onük den sendaktepa aliba telok aser nisungtemi timtesüidang angatetteptsü ayongzüker" ta pai ashi. Ajisüaka, Rajnath Singh-i mepishibaji Gorkha Janmukti Morcha-ibo pela magizüker.

GJM-i ketdangtsüa Gorkhaland state balaka tentettsü atema mapa inyaker aser parnok lennirtemi ashiba agi, MHA-i parnok den indangindanga jembitsüla. Tir election agitsü aliba jakdang, Centre-i West Bengal dena state tem anema o mejembinür, ta GJM lennirtemi ashi. Parnok indang general secretary Roshan Giri-i sorkar den ajuruteptsü atema Delhi nung oa lir, anungji Rajnath-i tanü yimjung alitsü mepishia sangdongba atema süngmanger, ta GJM lennirtemisa ashi. MHA-i tanü sangdong agütsüba ajanga BJP aser GJM tsüngda yimtenren mangatettep

ka adoktsü. Centre sorkari tenemleni sepaitem yokba aser BJP pusemba Gorkha nung dak teka sangshiba atema GJM lennirtemi Centre dang mepelar, ta Roshan Giri den yariteper kati ashi. Mamata Banerjee-i Gorkhaland pusemertemi North East nungi telungpur teloktem den tesendaktep lir ta jembibaji tiyazü ta GJM tanishir Bimal Gurung-i tanü metetdaktsü. "Lai jembiba nung kuli kecha mali. Lai nübertem mashileni anitsü meranger. Onoki takhangba agütsüba nung telungpur teloktem den tesentaktep kecha mali. Onok maitsü atema rarar. Gorkhaland metentet tashi onoki inyaktsü" ta paisa ashi.

Srikanth-i Indonesia Open Super Series kokogo

Jakarta, June 18 (Agencies): India nung badminton asayar Kidambi Srikanth-i Indonesia Open tebur kicha asaya koka Super Series title asembuba kokogo. Pai Deobarnü final asaya nung Japan nung asayar Kazumasa Sakai madak takok angu.



World No.22 Srikanth shibai April ita Singapore Open final tongteta liasü pai Sakai minute 37 agia 21-11 21-19 agi straight set nung koka senpet sen \$75,000 agizük.

"Pai kanga junga asayaogo, talisa tanabuba asaya nung pai kanga junga asayatet aser kü atema point 6-11 ta aliba nungi 13-13 ta tongtetba ajanga asaya nung temelenshi bener aru," ta Srikanth-i ashi. Pai tang tashi nung iba asayamong akokba densema 2014 China Super Series Premier aser 2015 India Super Series ta koka lir.

"Ni kü coach tenüngsangner kechiyong pa aruba sülen ni Singapore nung final tongtet aser tang iba asayamong akoker, koba asayamong rongnung tulutiba ama züngshir. Maneni ni kü pusemertem shirnoki hopta peyong ni nungita aruogo parnok ajak dang kanga pelaba lemsateper," ta pai shisem. Badminton Association of

India (BAI) tir Himanta Biswa Sarma-i Kidambi Srikanth nem sen lakh 5 agütsütsüba nangzükogo. "Srikanth-i Indonesia open akokba ya linük ajak asoshi pelatepba mapang ka lir. Ni asaya temli pa takok atema tenüng asangtsü asoshi call süa liasü. Pai linük ajak ajungkettsüogo aser tarutsü nunga pai takok tajung angutsü ta ni temolung lema bilemer," ta Sarma-i ashi.

"Onok ajak Kidambi-i akokba atema kanga pelateper aser iba tepela lemsateptsü atema Dr. Sarma-i BAI tenüng nung pa nem sen lakh 5 agütsütsü nangzükogo," ta BAI General Secretary Anup Narang-i ashi.

Kasa mapang nung Ato kilonser Narendra Modi-i Indonesia Open Super Series nung Kidambi Srikanth-i takok anguba atema pa tenüng sanga liasü.

ACAUT-i NSCN-IM dang ... (Tapak 1 nungi)

Maneni, Maytas-Gayatri aser NCSU-i kechi südir süaka mapa inyakba manentsü atema mepishir. Naga nungertem atema lenmang tongtipang yangluba nung tetsükdaktsü maludaktsütsü saka tajungtiba nung yanglutsü ayongzüker. Külen state sorkaria ola madoki melii, Naga public dang mapa nung tetsükdaktsü majurutsü ta tenangzükba agiba sangdongtsü ayongzüker, ta ACAUT-isa ashi.

lemtetba nung ACAUT-ia pusema nungiter. AH-1 yangluba mapa nung nisung shinga nema tetsükdaktsü bener marudaktsütsü ta parnokilemteta lir.

Western Angami Public Organization-i taoba mapang

ACAUT Nagaland-isa Naga Yimten telok 6 indang Working Group-i Nagaland nung aliba public dang, AH-1, Nagaland sector 4 lane yangluba mapa nung saru memeshitsü ta sangdong agütsütsü ayongzüker, ta Media Cell-isa metetdaktsü.



Nottingham, June 18 : Nottingham Tennis Centre nung Britain Tennis - Aegon Open asaya nung Australia tsür Monique Adamczak aser Storm Sanders nati Great Britain tsür Laura Robson aser Jocelyn Rae madak takok anguba sülen takok marok den külemi tangokba noksa nung angur.

BILEMDANGANG
"Temelenshi kibong nungi adoker".